

AMUNESIA YA KUMUUYA



Eno Nda syoma, eno Nda syoma,
Zintu zyonse zila konzeka, eno Nda syoma;
Eno Nda syoma, eno Nda syoma,
Zintu zyonse zila konzeka, eno Nda syoma.

² Katu ciimvwi asyoonto buyo eno ku Ijwi lya Mwami. Atu jule kuli Amosi, musinsimi Amosi, chipati ca 3, kutalikila kampango ka 1.

³ Ndi yabnnda kulumba Mucizi Juanita a Anna Jeanne a Mucizi Moore, ku kainduluko ako kabotu ika nyimbo. Kandi josya musule, mbuli Mbwe kkede alya a ku kaswiilila. Ndali kuyeeya, cindi nibakali a ndiswe, kabaimba mu miswaangano yanguzu, Mukwesu Jack a Ndime twali kwaambaula, balo basimbi bakali basimbi baniini loko, baniini buyo ba sikistiini, cintucimwi mbuli eco, musimbi. Lino, Nda yeeya kuti, Mucizi Anna Jeanne uli jisi bana bosanwe, a Mucizi Juanita uli-uli... i mutumbu wa bana bobilo. Elyo tuli munsi maningi ku kubbila kwazuba oko, banakazi, kwinda mbo twakabede kaindi, kutandila lwandaano lwa myaka ili kkumi acisambomwe. Tali kalampi, tuno zabuka, eco ciindi cabulemu.

⁴ Eno muli Amosi chipati ca 3, atu bale.

Amumvwe eli ijwi MWAMI ndya kanana kulwisya ndiinywe, O nobana ba Israyeli, kulwisya mukwasyi onse oyo Ngwe kaleta... kuzwa mu Egepita, kwaamba,

Nduwe olikke Ngwe kaziba... yoonse mikwasyi yaa nyika: nkikaako Njo kusubula nkambo ka... milandu yako.

Sena bobilo balakonzya kweenda atoomwe, citakuti ba zuminana?

Sa mulavu uyo vuluma mu cisaka, kakuli tana kujata cisaalo? sa kana ka mulavu kaompolola mu bulyango bwako, ikuti na takana jata cintu?

Sa kayuni inga kawida aa kakole kala nyika, awo aatakwe sikukateya? sena umwi uyo gwisyu kooze kuzwa ansi, elyo kata jisi cintu kuzwa kuli nkako?

Sena i mweembo uyo lizigwa mu munzi a bantu kaba tayoowi? sena kuyooba bubi mu munzi, nkabela MWAMI ta bulekela kucitika?

Ncobeni Mwami... taka citi cintu, citakuti wa yubununa maseseke akwe ku balanda bakwe basinsimi.

I mulavu wa vuluma, nguni uta kayoowi? i Mwami... wa kanana, nguni uta konzyi kusinsima?

Atu kotamike mitwe yesu.

⁵ Mwami Jesu, eci acibe, Ijwi Lyako, Mwami, atube a luswaanano sunumasiku ku caabilo eci. Twa lomba, Mwami, kuti Yebo utupe ciiyo ca cibalo, ncotu tabweze kuzwa awa, alimwi acilete lulemeko kuli Nduwe. Tu longezye mboli mbo tulindila, Mwami, sunumasiku, aa Ijwi Lyako. Ponya baciswa a bapengede. Kovuna basweekede. Kopa nsana ku bakompeme, Mwami, abo bayaa bukompama, kunyama a kumuuya. Elyo tupe kutilwa kupati kwa Busyu Bwako, nkambo twa kulomba mu Zina lyा Jesu. Ameni.

⁶ Ndi yanda kubweza cibalo, kuzwa kuli ceeći, sunumasiku: *Amunesia Ya Kumuuya*.

⁷ Muta lubi, juunza, nku kombela baciswa juunza. Tu langila Mwami kuyo cita zintu zipati maningi, juunza isikati aa tuu okuloko, oko nko... cindi twa kutilika miswaangano yesu. I mulombe unooli kokuno kuzo vozya makaadi amipailo. Elyo onse uyo kombele uya kuyanda kukombelwa. Alimwi tu langila ciindi cibotu, juunza, mu Mwami.

⁸ Lino nobantu bako okuno, baswaya batali bamu tauni. Amuyeeye, kuli mambungano, mabotu aa Makanimabotu aazwide moonse mu dolopo. Muli tambwidwe nyoonse.

⁹ Nda zwaa kwaambaula a umwi wa beembeli bangu mbotu beleka abo, anze, wazwaa kunjila, Mukwesu Jackson, wakali wa mbungano ya Methodisti, kunselelo lyा dolopo na obilo anselelo lyesu.

¹⁰ Elyo mbangaye bali okuno baswaangana mu cikombelo, atu bone maanza anu, koonse. Ma, Ndili kkomene masimpe—masimpe kuba andinywe kunselelo. Oyu muswaangano ukozyenye loko Nkwe kabede ku Indiana kwacindi cikubwene. Ndi yeeya makani akujoka, cakufwambaana kapati, a kusimpa tenti akuba ayeeyo Myeembo ili ciloba yamanino, na Mwami wayanda.

¹¹ Aboobo, eno, pele amuyeeye juunza. Muta kulubi, juunza aa tuu okuloko. Elyo, eno, kuswaangana kwesu kuccilila kuyo talika mvwiki iccilila, mu Tampa, Florida.

¹² Eno Ndi yanda ku kanana aya *Kumuuya Amune-... Amunesia*.

¹³ Lino, oyu mulombwana muubauba ngu twaambaula, Amosi, kwa ciindi buyo cisyoonto, ku kujana ntalisyo yesu katutana kusika ku cibalo. Eci cakali ciindi ca kusumpuka kupati mu Samariya. I Srayeli yakali sumpukide. Ba kaitobelede nconzyo inyika elyo bakali sumpukide.

¹⁴ Kusumpuka lyoonse tacili citondezyo ca zilongezyo zya kumuuya pe, pele ziindizimwi kuliimpene. Bantu ndiza bayeeya kuti weelede kuba mboni zinji zyanyika, a kutondezya kuti

Leza uli mu kukulongezya. Obo tabuli bwini. Ziindizimwi kuli munzila imbi.

¹⁵ Pele tula jana, walo, ta tuzyi kunji kujatikizya oyu mulombwana muubauba. Walo, ta tujisi bulunguluzi, oko nkwa kazwida. Tu limuzi, kweendelena ku Lugwalo awa, walo mweembeli wa matanga, pele Leza waka mibusya.

¹⁶ Nda konzya kuyeyela kubona, a buzuba buwi bupya mu Samariya okuya, umwi wa miinzi mipati ya kweebela zilengwaleza zya inyika ku buzuba obo. Ncintucimwi cili mu bubambe, inga twati, Miami, na—na Hollywood, Los Angeles, amwi masena mbuli obo, busena bumwi bupati bwa basikweebela zilengwaleza. Elyo inga twa yeeyela ku mubona. Ta kalina sikide mu munzi uli booboo. Pele, wa kajisi Ijwi lya Mwami, wa kali kuboola ku munzi oyu mupati oko cibi nko caka lundene ku mabazu onse. Bakutausi boonse bakali zwide ku Ijwi lya Leza, alimwi teeba kajisi musinsimi mu myaka minji.

¹⁷ Elyo aboobo oyu mulombwana muubauba, mbuli mbwa katanta cilundu, kubaanga nkunyiika ya Samariya, Nda konzya kwezeezya ku mubona, zuba lipya kalimweka kunselelo, a mvwi ku meso akwe, ameso akwe maniini akafwifwinyana, a mutwe wakwe, wa lubala kaumweka, mbuli mbwa kalanga ansi aa munzi oyo. Elyo meso akwe akafwifwinyana. Ta kali kulanga eco basikweebela zilangwaleza nzoba bona kanji, kuya ku dolopo kuyo bona mabibo awo onse a bweebesi. Wa kalanga akubona kubonekela oko dolopo mbo lyakaba, dolopo elyo ciindi cimwi lyakali dolopo lya Leza, nkabela lyaka njide mu kubola kwa kulilemeka mbuli oko. Ta cigambyi . . .

¹⁸ Oyu mulombwana, muubauba wata kazizilwe wakali Amosi musinsimi. Alimwi eno ta tuzi maningi kujatikizya nguwe. Ta tuzi oko nkwa kazwida. Basinsimi kanji basika buyo aa cilao, cakutaziba, akuzwa munzila njionya. Ta tuzi oko nkobazwa, oko nkobaya, tatuzi makani antalisyo yabo. Leza ubabusya buyo. Ta kali kubotelezya loko kulanga, pele wa kajisi MBUBOOBU MBWAAMBA I MWAMI. Eco nceecintu cipati Nce bona. Mubwini, wa kasika ku Samariya aku talika muswaangano yakwe yanguzu. Ndili masimpe ta kajisi kubelekela antoomwe amuntu naba omwe. Ta kajisi kkardi lya luswaanano kuzwa ku kabungwe kamwi. Ta kajisi zyeelelo zyamapepa zyaku tondezya nkamu nkwa kali kuzwida. Elyo, pele, wa kajisi cintu comwe, wa kajisi Ijwi lya Mwami lya dolopo eelyo.

¹⁹ Elyo Nda libuzya, ikuti na inga twa mulonzya Amosi, asunu, kuselemukila ku ciindi cesu, Nda libuzya ikuti na nakatambula mu dolopo lyesu asunu. Nda libuzya ikuti na nitwa kamutambula, na inga twacita mbubonya mbuli mbo bakacita. Tu jana kuti madolopo esu mu kunyonganya nkukonya. Elyo tu jana kuti cibi ncipati buyo akati ka bantu, mbuli mbo cakabede kaindi. Elyo Nda libuzya, ikuti na oyu muntu, muubauba

wata kazizilwe, obo mbwa kali kuyo konzya kutalika oyu muswaanganao wanguzu? Buti, mpaali mpakalino talikila? Ino ni mbungano nzi njaunka, na nguni uyo beleka antoomwe a nguwe? Ta kajisi cintu cakutondezya oko nkwa kazwida, ta kajisi cintu pee cita MBUBOOBU MBWAAMBA I MWAMI wa dolopo.

²⁰ Wa kaba jana kabanyongene kapati a kupilingana ku mictito, cakali ciindi cipati. Banakazi mu dolopo eelyo baka tandila kuba mbuli mbo babede mu United States. Ba kali nyongene. Zintuzyonse Leza nzyakali kulangila kuzwa kuli mbabo, ba kaunkide munzila imbi nconzyo. Elyo—elyo tu jana kuti bwakali busena bupati oko nkoba kajisi kuzyana kunji mu tugwagwa, banakazi bakali kusamununa zisani zyabo cabwaamu, azimwi zimbi, mbuli kulisangabalisya kwakutubula zisani. Mubwini, oko kwakali kulibotelezya kwabuleya mu mazuba ayo, eno mazuba onse. Amulekele bube bwaciindi bupye, nkabela ta mweelede kwiinka ku zipekupeku zimwi. Zyoonse zili a tugwagwa, kuli konse, munzila ili onse. Mause kuli ndiywe nobanakazi, kucita mbuli ceeco! Sa tamuuaside kuli lwanu?

²¹ Elyo mpawo—elyo mpawo Nda kaamba eco ku mwanakazi awa, calino, elyo waa kati, “Baa,” waa kati, “Mukwesu Branham,” kati, “kuti, eco—eco cili mbuli bamwi banakazi.”

²² Nda kati, “Pele ta tweelede kuli lemeka mbuli bantu bamwi. Tuli baindene. Tuli ii—ii bantu baindene.”

²³ Kundi yeezya mwanakazi, wakati, “Ee, Mukwesu Branham,” umwi umbi wakati, “Nse—Nse—Nse sami ezyo zigonkolole.” Kat, “Ndila sama tulukwe.”

²⁴ Nda kati, “Eco ncibyaabi kwinda.” Uh! “Leza wakati, ‘Caloncisesemyo,’ ku meso Aakwe, ‘ku mwanakazi kusama cikobela ca mwaalumi.’” Mbo mbubo ncobeni.

Umwii wakati, “Ee, taba pangii zisani zimwi zimbi.”

“Ba cipanga micini ya kusumya akuba a zintu.”

²⁵ Taakwe ntamizyo. Nceeco buyo cili mu moyo. Eco nce citoondezya aanze. Cila—cila lizibya cini.

²⁶ Elyo eno tula jana, mu dolopo eli, lya kanyongana ku mictito. Bakambausi bakali kuyoowa kwaamba cili conse kujatikizya ncico. Elyo, pele baka jisi mulombwana oyu, muubauba wakaindi katanta cilundu, wakali kuboola kubaambilia MBUBOOBU MBWAAMBA I MWAMI, “Amusalazye eci cintu, nape moyo njila bwaange.” Elyo wa kapona kubona mazuba akuzulila kwa cisinsimi cakwe. Wa kasinsima mu mazuba a Jeroboamu Wabili, oyo wakali mutande buyo, nekuba; wa—wa kagwaya masi ambi. Elyo—elyo oyu Amosi muubauba wakasinsima a kubaambilia, wa kati, “Nguonya Leza ngo mutaminina kubelekela, Uyo munyonyoona.” Elyo Wa kacita.

²⁷ Elyo ikuti na jwi Lyakwe lyaba okuno sunumasiku, mu i...mu Birmingham, sa inga lya taminina cintu nciconya ku mambungano. “Nguonya Leza ngo mutaminina kuti mwakabelekela, uyo munyonyoona buzubabumwi.” Nse kanani ku bbunga eli okuno. Aya mateepu ala zunguluka inyika yonse. Lino, amuyeeye, obo mbwini.

²⁸ Mpawo wa kajana kuti, cindi na kanjila mu dolopo, cakuti wa...ezi zintu zyonse, Nda libuzya obo mbwa kalimvwa kulanga akubona kunyongana oko kwa bantu ba Leza, kuli mbabo nkwa katumwa.

²⁹ Nda libuzya ikuti na inga twa mutambula eno? Ikuti na wa boola, sa inga twa—sa inga twa beleka anguwe? Sa inga twa mupa kubotu kwesu—kwesu kwinda? Sa inga twa muswiilila? Sa inga tweempwa ikuti na wa twaambila kuti tweedele kujoka ku Ijwi lya Mwami akucita nzila Mwami njá kaamba kucita?

³⁰ Nda libuzya ikuti na bacizi besu inga na bacitanzi kujatikizya masusu abo ageledwe? Sa inga balekela masusu abo kulampa alimwi, ikuti na Amosi wasika? Inga naka kambauka, alimwi Ndi mwaambila ceeco, nkaambo ndi Ijwi lya Mwami.

³¹ Nda—Nda libuzya ikuti na maboodi esu—ikuti na abikka bamadaikona, bali kwete ziindi zyotatwe na zyone, a—a zimwi mbuli ezyo, akusola kuba bamadaikona, Nda libuzya ikuti na ezi zintu zyonse, Nda libuzya eco ncanga wacita ku mwaalumi oyo unga walekela mukaintu wakwe kusama zigonkolole akunjila mu kagwagwa okuya, a kugela bwizu mu lubuwa, kubusena bwa lubuwa, cindi baalumi nibainda munsi? Nda libuzya eco ncanga waambila mwaalumi mbuli oyo?

³² Inga wacitapatila canguzu akonse kwakali muli nguwe, nkambo wa kajisi MBUBOOBU MBWAAMBA I MWAMI, alimwi nata kakonzya kucita cimbi pele eco. Wa kabajana mu buzuba obo a kaambo kabbi ka bulwazi, amunesia ya kumuuya, alimwi nce ncico ncobeni ncoti jisi asunu.

³³ Lino, mbobuti mbwa kaziba eco cakali kucitika? Mbobuti Amosi mbwa kaino ziba? Lutaanzi, wa kali musinsimi. Elyo, cintu citobela, wa kaziba bulwizi kwinda ku kulangalanga kwakaliko, alimwi wa kaziba eci cakajanwa mbo cakabede.

³⁴ Ikuti na dokotela walanga cilwi camatishu akubona kuti eco ncikoto caka jatilila, uli zyi kuti taakwe cintu cita lufu lusyeede. Nku konse, citakuti Leza wacita cintucimwi kujatikizya ncico.

³⁵ Ee, cindi walanga dolopo, nkabela walanga bantu, walanga mbungano, akulanga bantu baka tantamuka maningi kuzwa kuli Leza, takukwe cintu cita kulangalanga pele, “Cibi! ‘Alimwi bulumbu bwa cibi ndufu.’ Nku fwa.” I kulangalanga kula tondezya kuti niinzi. Inga mwabona, cindi bantu bata ntamuka kuzwa kuli Leza elyo taba kali swiilili Ijwi, akuta ciba akuyandisya kwa Ijwi, mpawo kuli kulangalanga komwe kuli

ncico, “I buntu obo bubisy, obo buntu buya kufwa.’ Kutasyoma kuyo pambula kuzwa kuli Leza.” Obo mbombubo ncobeni.

³⁶ Cakuti, wa kalibuzyi bulwazi, cakajanwa mbo cakabede, cindi na kabona bulwazi bwa—bwa cibi mu dolopo.

³⁷ Lino, eyi amunesia, twa ambilwa kuti ni ii—ii...kukucitya kuba mu busena obo mota konzyi kuliziba omwini. Lino, ncintu ceenzu. Ta cicitika kanjikanji, pele kicipa kuzwa ku kulebuka. Walo muntuumwi uutazyi akwalo kuti nguni. Mula kujana kuzwa mu lumamba, ciindicimwi, bamasooja baka kujana. Ziindizimwi bantu bala kujana. Cintu cimbi cikuleta, nku libilika. Kulibilika kuyo kuleta.

³⁸ Kulibilika takukwe bubotu kuli mbubo, pee. Inzya, kosotoka buyo—buyo—buyo kulibilika, akuzumina lusyomo.

³⁹ Umwi wakati, “Ee, eno, ino kuti uyo dubulwa kuseeni, sa inga tolobilika?”

Nda katи, “Peepe, nse yeeyi booboo.”

“Nkaambonzi?”

Nda katи, “Kulibilika taku kaciti cintu cita kundi bamba kwiindila kubija.”

“Ee, ino ciya kugwasya nzi kuba a lusyomo?”

Nda katи, “Ambweni inga lwa kuvuna.” Alimwi oko kuliluleme, mwabona.

⁴⁰ Aboobo kulibilika taku jisi bubotu kuli mbubo, pele lusyomo luli jisi bubotu bonse. Kosyoma!

Lino kulibilika ciindicimwi kula ileta.

⁴¹ Alimwi cintu cimbi eco cikuleta akati ka bantu, nkuba aakati ka mizeezo yobilo. Eco ciya kuleta amunesia. Elyo kula kuleta ku busena oko—oko, ncobeni, eco ncoka cita, wa kasweekelwa kubuzyabuzya kwako. Wa kasweekelwa kuyeeya kwako. To konzyi kubamba...To zyi na nduwensi. To konzyi kuliziba omwini. Inga wendeenada konse, kulya a zintuzyonse, pele, yebo, inga kotana konzya kuliziba omwini. Inga waba a Iwiiyo lwako lusumpukide kapati, inga wa...Iwiiyo ndulonya ndo kajisi, pele tozyi oko nkolwa kazwida, to zyi na nduwensi, oko nko zulilwa. Oyo ngu amunesia, obo mbo twaambilwa.

⁴² Tula lizibya ku mikwasyi yesu, mu buumi obu bwabantunsi, ku lukwatano. Elyo a bamakaintu besu, mbo tukwata, a mukwasyi wesu uli lizibya ku lukamantano lwa lukwatano lwesu—lwesu. Elyo mpawo, cintu cakuyeeya, ino kuti eci cintu ciyoosya cacitika kuli nduwe nkabela inga tokonzya kwiibaluka oyo ngo kakwata, nguni mukaintu wako, mbaali bana bako, mbaali bauso a banyoko, nguni simukobo nyokwe? Eco inga cabia ii—ii cintu ciyoosya.

⁴³ Mpawo tula lizibya, alubo, inga twa lizibya tobени mu mukowa wabantu, kwinda kukuba abupampu alimwi—alimwi

kuba baindene kuzwa ku buumi bwa banyama. I munyama takonzyi kuyeeya, walo weenda buyo kubebesya kulimvwisya. Ta jisi buntu. Alimwi, pele tuli buumi bwa banyama. Eco citubamba kuba baindene... Tuli ma mammalo, pele cintu... Oyo mammalo walo munyama uusitikizya kukasaala kwa mubili, alimwi tuli mu bupange bwa munyama. Pele eco citwandaanya, tula lizibya kwinda kukuba a buntu, manjezeezya ala twaambila cintu ciluleme a cilubide.

⁴⁴ Lino kuli busena, cindi wajana eyi amunesia, inga waba mbuli Nebukadinezara, wa kali, oyo wakalisumpula mwini ciindi cimwi, nkabela Leza waka mulekela kuyeeya kuti wakali munyama. Elyo wa kapona mu nkanda alimwi—alimwi kalya bwizu mbuli ng'ambe. Elyo—elyo masusu akwe—akwe akalampa kusika ansi lya mubili wakwe, mbuli mapepe aa sikwaze, alimwi wa kaba amoyo wa cinyama muli nguwe. Mwabona? Eyo yakali amunesia, nkaambo wa kaluba kuti wakali mwaami. Wa kaluba kuti wa kazyalwa kali muntunsi. Elyo wa kayeeya kuti wa kali munyama, aboobo wa kalilemeka mbuli munyama, nkaambo wa kaluba kuti wa kali muntunsi.

⁴⁵ Eco ncitere loko, asunu. Elyo tula luba, ziindizimwi, obo Mbungano ya Banakristo mboibede. Tulilemeka mbuli inyika. Eco citondezya kuti tu jisi amunesia wa kumuuya, nkaambo kakuti tau lilemeki mbuli Banakristo. Muli lemeka mbuli inyika. Mu tambula moyo wa inyika, nkabela uleta ceeci.

⁴⁶ Mpaawa tu—tu jana kuti Israyeli yaka yutululwa, ya kayutululwa ku inyika, nkabela yaka wida mu mugelo oyu mulamfu. Elyo oyu musinsimi wakatumwa ku bafumbulula kuzwa muli nguwo, ikuti na wa kalikukonzya, a kubaambila. Leza, ku luzyalo Lwakwe, wakasala Israyeli kuzwa ku mikwasyi imwi yoonse aa nyika. Luzyalo lwaka cita ceeco. Wa kabapede kusala nyika. Wa kabapa maanda nge bata keelede kuyaka. Lea wakacicita eco, waka basala. Wa kabapa mpulazi nzoba batakaaula. Wa—Wa kabapa, Wa kabapa zyakulya nzoba takabyala. Wa kabapa mikalo njoba takasya. Wa kabapa kuzunda nkoba takawina. Wa kabapa luzyalo lwatakali kubeelela. Leza wakacita eco kwinda ku luzyalo Lwakwe ku bantu Bakwe, iba Israyeli, basale Bakwe, bayandwa Bakwe.

⁴⁷ Elyo Wa kati, mu Bbaibbele, "Wa kamujana mu muunda, mbuli musimbi muniini kakkede mu buloa bwakwe, alimwi Wa kamusanzya akumu salazya, a ceeco Nca kacita. Pele Leza nakamana kutonzya luse olu lonse kuli nguwe, nkabela waa kavuba," waa kaba a amunesia, amunesia, "alimwi waa kaluba koonse kujatikizya zintu eci nkozya kazwida."

⁴⁸ Ndi yeeya kuti ncifwanikiso ca U.S.A., 1964. Ila ciswa ku bulwazi mbubonya. Tuli mambungano mapati aanguzu. Tuli bantu, bapati benguzu. Tuli mamilioni mu mweelwe, alimwi twa kaluba ezi zintu nkozya kazwida.

⁴⁹ Ba kajisi cilwazi cibbi ca ncico. Eelyo Leza nakamana kuba gwasya, akuba gwisyu ku manyika onse abahedeni, akuba bamba kuba bantu bapambukide, wakaba pambula kuli nguwe Mwini. Wa kati, “Wa kabweza musaansa kuzwa ku cisi cimbi a kuusyanga mu cisi cimbi, a nzila Mbwa kaubamba konse kuti uzyale micelo a kuvuzizya, pele musaansa wakaluba oko zilongezyo zyawo nkozya kazwida.”

⁵⁰ Mbulonya bantu ba Leza mbo bacita, mu mazuba aya akumamanino, baluba obo bumboni bwakuba Munakristo nco bwaamba. Kwaba alubo, oyu amunesia waboola a bantu. Taba konzyi kuliziba beni.

⁵¹ Ba, bakaluba konse kujatikizya Nkuko. Ba kabuluba busalali Bwakwe. Ba kauluba mulao Wakwe. Banakazi bakali kupona mbuli bamwi ba inyika.

⁵² Mbungano ya Leza a bantu Bakwe zyakali obo lyoonse, “Ii bantu bakapambulwa, ii—ii bantu bakaitwa kuzwa, bantu bagamya, cisi cisalala, bupaizi bwabwami; kabatuula zituuzyo zya kumuuya kuli Leza, micelo ya milomo yabo, kaba lumbaizya Zina Lyakwe.” Leza wakaita Mbungano Yakwe a Kwi pambula kuzwa ku inyika, ku bukanze obo mboonya. Elyo Wa kaipa mulao, alimwi Walo, Wini, weelede kusalala. Wa kati, “Ndila salala, nnywebo mweelede kusalala, alimwi kakutakwe busalali taakwe muntu uya kubona Mwami.” Leza wa kaamba boobo, Mwini.

⁵³ Elyo Wa kaita bantu bakwe kuba oyu musyobo wa bantu, pele ba kaluba kujatikizya ncico. Ba kaliilubide milao Yakwe, alimwi bakali lubide kulilemeka kwabo. I banakazi mu tugwagwa, banakazi ba Israyeli okuya, umwi aumwi kalangila ku—ku mita kwinda ku Muuya Uusalala, kuti bakazyale Mesiya, elyo mpawo kulilemeka boobo. Micito yabo yakali mibi kapati.

⁵⁴ Ndi yanda kwiimikila awa aniini, ku kwaamba kuti ncintu ncicinya akati ka bantu besu, asunu, abo baliita beni kuti Mbanakristo. Micito yabo, ikuti na mwakonzya buyo kuziba!

⁵⁵ Ciindi cimwi, ku Musanza. Nda kabala kaano kuzwa kunselelo okuya, oko nkoba kali kuvuba bazike. Bakali kutola bantu abo akuba sambala mu musika, mbuli buyo mbo konzya mootokala wakabeleka kale. Elyo mpawo kwakali sikuula, sikuulila bamwi, wakali kunga wasika a kusala aba abazike a kubaula, elyo mbuli buyo mbo konzya ku mootokala na cintucimwi.

⁵⁶ Elyo abo bazike kale kulaale kuzwa ku cisi cabo cakuzyalilwa. Ba kali kuzwida ku Africa. Ba mabbunu bakali kubabba, akubaleta okuno ku tusuwa, elyo mpawo kusisikizya kubatola mu United States akubasambala kabali bazike, kuzwa kumasena amu Jamaica a mweengelede.

⁵⁷ Lino tu jana kuti abo bantu baka luuside. Ba kabbigwa kuzwa ku miinzi yabo beni. Ba katolwa a sinkondo, nkabela baka

luuside. Niba kabona limbi balumi babo, na bamakaintu babo limbi, bamawisi a bamanyina, bana babo. Ba kali nconzyo... Ba kali kubanabba, a mikkwi, kubacitya kubeleka, nkambo bakali bantu baka uside.

⁵⁸ Elyo buzuba bumawi, sikuulila bamwi wakasika ku mpulazi imwi ya nkwaalale, wa kabona cikama ca bazike okuya kaba beleka. Elyo wa-wa kanjila a kubuzya mukamwini, kati, “Mbangaye bazike mbo jisi?”

Kati, “Batandila ku mwaanda.”

Kati, “Sa uli jisi umwi ngo konzya kusintanya na kusambala?”

Wa kati, “Inzya.”

Kati, “Andi balange lange.”

⁵⁹ Elyo wa wakaunka mu muunda a kubalangilila, nkabela wa kababona kaba banabba konse. Elyo nikwakainda kaindi, wa kabona umwu mwaalumi mukubusyi ngo batakali kunabba. Wa kadukumene kaango kakwe a cilezu cakwe kacipakamene; tii baka munabba. Aboobo sikuulila bamwi wakati, “Ndi yanda kuula oyo muzike.”

Elyo wa kati, “Pele tali wa kusambala.”

⁶⁰ Wa kati, “Ee, ino wiindene buti oyo muzike?” Kati, “Sa oyo muzike ngu simalela kuli boonse bambi?”

Wa kati, “Peepe, walo muzike buyo.”

Wa kati, “Ee, ndiza umusanina bwandeene.”

Wa kati, “Peepe, ulida mu kaato a bamwi bazike.”

⁶¹ Wa kati, “Ee, ncinzi cimu bamba kuba wandeene kuzwa kuli bamwi bazike?”

⁶² Wa kati, “Ee, eco Nda kalibuzya, ambebo, kwa ciindi cilamfu. Pele buzuba bumwi Nda kaiya, kuti okuya mu nyika yakuzyalilwa oko nkwa kazwida, wisi walo mwaami wa mukowa onse. Elyo nekuba kuti ngo muzwakule, alimwi uli kulaale kuzwa ku muunzi, nekubaboobo uli zyi kuti mwana wa mwaami, elyo ula-ula lilemeka mwini mbuli mwana wa mwaami.”

⁶³ Nda kayeeya, “Pele, oyo, ikuti na Muntu usiya uuzwa ku Africa, alimwi wakalizi kuti bawisi bakali basimukowa a mwaami weendelezya mukowa, obo mbo ceelede kucitila Munakristo wa kazyalululwa, mwaalumi na mwanakazi, kuti Taata wesu Mwaami waku Julu mu Bulemu!” Twe elede kulilemeka mbuli baalumi a banakazi Banakristo. Twe elede kulilemeka mbuli ncico, kusama mbuli ncico, kwaambaula mbuli ncico, kupona mbuli ncico. Nekubakuti tuli bamuzwakule, nekubaboobo tuli bana ba Mwaami. Ameni.

⁶⁴ Micito yesu, katalilemeka kabotu mu mazuba aya ngo tuponamo eno! Israyeli yaka lokela mu mugelo oyo nguonya nkabela ayalo yakapilingana. Ba kaluba milao ya Leza,

“Uta kaciti bumambi, alimwi uta keemuzyi mukaintu wa simukobonyokwe,” aimwi imbi. Ba kalubide eyo milao. Teeba—teeba kacili kwiiyanda limbi. Elyo ba—ba kayanda ku—ku ba mbuli bamwi be inyika, mbuli buyo mbungano mboyaba asunu.

⁶⁵ Ciindi cimwi, Israyeli, cindi niba katalika, bakali kuyanda kuba a mwaami kuyeendelezya. Samuleli waka baambila, musinsimi waka tumidwe kuli mbabo, wa kati, “Eno sena Nda kasola kumwaambila cili conse mu Zina lya Mwami cita eco cakacitika?”

Ba kati, “Peepe, tona cita.”

⁶⁶ “Sena Nda kasola kumu kumbila cakulya cangu a mali, mali anu, alo, kutegwa nkeponena mpawo?”

⁶⁷ “Peepe, tona cita ceeco. Tona twaambila cintu, Samueli, pele eco cakacitika. Alimwi tona tulomba mali esu, kuti ujane akuponena. Pele, nekubaboo, tu yanda mwaami, nekuba.”

⁶⁸ Leza wakaambila Samueli, “Koba leka babe anguwe. Tii bakaka nduwe; bakaka Ndime.”

⁶⁹ Israyeli yaka njide mu ciimo eco nciconya eno. Teeba kacili kuyanda basinsimi ba Leza pe. Teeba bakali kuyanda. Elyo ikuti na umwi wasika, a kubaletela Ijwi, akusola kuba josya ku Ijwi, baka Li kaka. Ba cicita eco lyoonse, mu ciyanza eco ca bubi.

⁷⁰ Cindi inyika a mbungano zyali kantanya, mpawo taba ciyandi cintu camuuya. Taba yandi MBUBOOBU MBWAAMBA I MWAMI. Ba yanda eco ncoba yanda. Ba yanda inyika, a kwaamba kuti Mbanakristo; a kupona mu inyika, aupona antomwe a inyika, a kupona mbuli inyika, elyo kaba cijisi kulyaambilila kwabo kwakuba Banakristo. Nywebo mulizi, cintu ca ncico neakuti, ngu amunesia ya kumuuya. Mbo mbubo ncobeni mbocibede. Ta bazyi kuti mbaani. Ba kaluba eco ncoba keelede kucita.

⁷¹ Ikuti na umwi wasika sunu, mbuli oyo, inga wakakwa mbubonya abuyo. Ba kajisi cilwazi cibbi canguwo, alimwi mbubonya mboba jisi asunu. Teeba kakonzya kuliziba beni a zintu ziindakugambya, limbi, nkaambo tiiba bakali kuziyanda. I Ijwi, Makanimabotu, tiiba kali Kwa ayanda. Bulwazi bwacibi bwa kabapenzya, alimwi baka buyanda obo.

⁷² Cibi cila botolezya ku moyo uutasandukide. Ciboneka kabotu ku mizeeo iitasandukide, pele ni nzila ya lufu. Takukwe cisyeede cita lufu. “I bulumbu bwa cibi ndufu,” alimwi weelede kutebula bulumbu. Wa kabyalila myuuwo, elyo eno utebula kambizi.

⁷³ I zitondezyo zya kumuuya a kukambauka kwa mutumwa wakasalwa uuza kwa Leza, tii kwa kababotolezya limbi. I banakazi bakali kukonzya kuseka moony amu busyu bwabo, a kuti, “Ta ndeedelede kuunka kuyo swiilila zintu mbuli ezyo.” Ino kuti eco tacina loolola! Ino ncinzi? Amunesia ya kumuuya,

mbubonya mboubede. Ba kaluba kuti Leza a Ijwi Lyakwe ncimwi buyo, alimwi Ta konzyi ku Li cinca.

⁷⁴ Ikuuti na musinsimi wakabuka aa cilao mu mazuba aya akupa citondezyo ca kumuuya, jwi lya kumuuya, akupa jwilya Leza kunze lyaco, inga ba Li seka buyo aku Li fubaazya.

⁷⁵ Nywebo muli kazyi kaambyo kakaindi, "Bafubafuba baya kweenda a mabbusu ajisi mpikili kutusindi awo Baangelo mpoba yoowa kulyata." Eco nce cintu eyi amunesia ya kumuuya ncoicita. Ibamba bantu kusika ku kasena kusikila awo mpoba batajisi kulimvwa kwa mukati kwabo. Taba yandi ncintu ca kumuuya.

⁷⁶ Mubweze muswaangano wini wa kumuuya, oko Muuya Uusalala nko uponya baciswa a kutweluka miyeeyo ili mu moyo, akwiibikka akati ka mambungano onse, Mulundano buyo mupati awa mu sitediamu eyi, akulanga eco cinga cacitika. Mu maminiti masyoonto, bantubonse inga bano nyamukide a kweenda kuzwa. Taba jisi cintu cakucita ancico. Taba bayandi cintu cakucita a ncico. Bayo swiilila ku mubandi wa bupampu.

⁷⁷ Pele cindi cakasika ku Nguzu zya Jesu Kristo, a bubuke Bwakwe, a Muuya Uusalala, taba yandi cintu cakucita a Nguwo, nkaambo ubapa milandu. Ubapa kuyandisya a cintu nco beeleder kuziba. Taakwe kukomwa, mubwini, kuboteleya kwa ciindi. Pele, kwalo, ikuuti walipa kuli nkuko, ku-ku leta micelo ya lweempo. Aboobo tu jana kuti, cindi oyu amunesia wa kumuuya wabajata bantu, mawo bali—bali mu ciimo cibyaabi. Lino tu jana cintu nciconya eno. Lino Ndi yanda ku . . .

⁷⁸ We elede kulizibya. Kumwi, weeledge kutondezya. Buumi bwako bula tondezya, sunumasiku, oko nkoli zibya. Ula lizibya kuba muli Kristo na anze lya Kristo. Toli akatikati pe. Taakwe cintu mbuli mukolwi ubateme kumwi. Taakwe muyuni usiya akutuba kumwi. Waa kafutulwa na tona kufutulwa pe. Uli musalali na sizibi, umwi na umbi, alimwi kulanganya kwako kwa kumuuya ku Ijwi lya Leza kula kuzibya nconzyo awo mpoimvwi. Yaa!

⁷⁹ Ijwi lya Leza, lyakasimpikizigwa, lyakatondezya kuti lubbizyo lwa Muuya Uusalala luli mbubonya lyonse mbolwa kabede aa Buzuba bwa Pentekoste na kufumbwa ciindi cimbi. Elyo Jesu Kristo ngu mbobuca nguwenya, sunu, amuya myaaka. Elyo kulanganya kwako kuli Eco kulazibya naa ujisi amunesia ya kumuuya, na pe. Mbo mbubo. Takukwe makani na uli daikona, na akwalo uli mukambausi, ta cibambi . . . Inzya, bala ujana, abalo. Aboobo tu jana kuti, kula yambukila kukugumana a kuuma cintu conse. Lino tula bona.

⁸⁰ Lino, kuba muna America. Kuba muna America, Nde elede kulizibya a cisi cangu. Eno amuswiilile kabotu. Kuba muna America, cindi Ne kazyalwa omuno mu cisi eci, Nda kaba sicisi, alimwi Ndila lizibya a cisi eci. Konse mbo cibede, Mbwe

bede. Konse mbo cakabede, Mbwe bede. Nkambo Ndila lizibya mbuli muna America, mpawo Nde elede kubweza mause aco onse, boonse bulemu bwaco. Kufumbwa mbocibede, Mbwe bede, nkambo Ndila lizibya a ncico. Ameni. Ndi yanda kuti mucimvwe. Ndila lizibya mbuli sicisi muna America, mpawo konse mbo cibede, Mbwe bede. Konse mbo cakabede, Mbwe bede. Nde elede kuba cibeela ca ncico. Nde elede kujana...ikuti Ndili sicisi muna America, Ndili cibeela ca America. Alimwi konse mbocibede, Mbwe bede.

⁸¹ Ta ndeelede kuluba ceeci. Ikuti na Ndi yanda kuti nkecili sicisi muna America, Nde elede kuyeyya kuti Ndili obo cisi cangu mbocibede, nkambo Ndila lizibya a cisi cangu. Ku ciluba, an—na...Ku cilwanina, na kufwida ncico, na kwiiminina zyonse nco ciiminina, Nde elede ku ciiminina. Obo cisi cangu mbo cibede, Mbwe bede. Eco nco ciiminina, Nda ciiminina. Kuba muna America uusyomeka, Njo libambilila kufwida ncico, ku cilwanina, ku ciiminina, kucita cili conse ciliko. Ndili cibeela caco. To konzyi kucisala kakutakwe kusala ndime. Cindi wamba cintucimwi caku cilwisya, ula caamba kulwisya ndime, nkambo Ndili muna America. Ku caamba kulwisya nduwe, mbuli muna America, a ceeco nco baamba kulwisya eci cisi, baamba kulwisya nduwe, nkambo uli cibeela caco. Uta kacilubi pe; cindi wa cita, mpawo ujisi amunesia, masimpe eni.

⁸² Elyo, koyeeya, toli sicisi wa America cindi wakakilwa kuba cibeela ca njiyo. We elede kuba. Obo America mboibede, we elede kuba ayebo. Nde elede kuba sicaabilo wa njiyo. Eci ncisi cangu, Nde elede kuba sicaabilo cayo. Obo mbo ibede, Mbwe bede. Mwabona, obo mboya kabede, Mbwe bede. Takukwe makani obo mbo cakabede, Ndi cili mbo cakabede.

⁸³ Kuba muna America, Nda kaselukila a Plymouth Rock, a njiyo, a basikale. Nda kacita; Ndili cibeela ca njiyo. Nda keenzya a Paul Revere, ku mucenjezya ntenda yakwe. Ikuti na Ndili muna sicisi wini muna America, Nda kaselukila aa Polymouth Rock. Nda keenzya a Paul Revere, kwii cenjezya ntenda yayo. Sena mulizi eco Nce pandulula eno?

⁸⁴ Nda kazabuka Delaware ya caanda maningi, a George Washington, a bamasooja bakwe bata kasamide mabbusu. Nda kaliko, nkambo Ndila lizibya a cisi eci. Eco ncakacita okuya cakali cibeela cangu; eco Nce cita eno ncibeela ca nguwe. Nda kalizibya a Washington, ku Delaware.

⁸⁵ Nda kaimikila a Stonewall Jackson, cindi buyumuyumu nibwakali bupati loko ku mulwana, alimwi ba kabuzya, "Mbobuti mbo konzya kwiimikila a bulambo bwa mabwe, kakuli buyumuyumu bula kulwana?" Mulombwana muniiini wa meso abbulu sibweeme waka bbompa suko a majombo akwe, wa kat, "Ta ndinywi maanzi kusikila Nda lumba Leza Singuzuzyonse kuli ngawo." Nde elede kwiimikila mbuli bulambo bwa mabwe

a nguwe. Nda kaimikila okuya a Stonewall Jackson. Kuba muna America, Nda kalizibya a nguwe a kwiimikila kwakwe. Kazabuka wa Delaware! Katulwana nkondo!

⁸⁶ Nda kaimika ndembela. Nda kali ambabo cindi niba kaimika ndembela a Guam. Kumane zyuulu zya bamasooja bana America nizya kapa maumi azyo, elyo cindi nkamu eyo niini niya kazuzila okuya kuwaala ndembela mujulu, Nda kalizibya ku kwiimika ndembela eyo; umwi aumwi wesi wakacita. Bonse basicisi bana America bakalizibya a ndembela eyo kailengelela atala lya Guam. Cindi Ne kamvwa cuti baka kasimpa ndembela okuya, misozi yaka mbulumukila a masaya angu. Oyo wakali ndime. Oyo wakali nduwe. Eco cakaamba ndiswe toonse, cindi nitwa kalizibya okuya ayeeyo.

⁸⁷ Konse mboi bede, Mbwe bede. Bonse bulemu bwayo mbulemu bwangu. Onse mause ayo mause angu. Ikuti na yakacita zintu zyamause, nkokuti Njo idunamina...kwiimina sampa lyayo. Ikuti na yatambula bulemu, Ndila tambula bulemu a njiyo, nkaambo Ndila lizibya anjiyo. Eno, ku lizibya, muna America weelede kwiminina mause onse a America, bonse bulemu bwa America, konse nkoya kasola kuba. Konse mboi bede, na obo mboiya kuba, ula lizibya a njiyo.

⁸⁸ Eno, kuba Munakristo wini, weelede kuba mbubonya. Ta tuyandi kuluba ceeco. Konse oko Mbwa kabede, Nda kalizibya a Nguwe. Ndila lizibya a Nguwe.

⁸⁹ Amubone, alimwi Uli muli ndime, alimwi Ndili muli Nguwe. Amubone, mpawo, onse Munakristo uuli Munakristo—Munakristo wini, wakali a Nguwe, “Cindi nyenyeesi zyaku buceso nizya kaimba antoomwe nkabela bana ba Leza bakaongolola kambo ka lutangalo, kakutanaba malengelo aa inyika.” Twa kalizibya amu zilawo zitamani a Leza, myaka ili mamilioni ali kkumi inyika kiitana sola kubumbwa. Nda kaliko kaindi okuya a Nguwe. Ikuti na Ndi jisi Buumi Butamani, Nda kaliko okuya a Nguwe. Nda kalizibya a Nguwe, “Cindi nyenyeesi zyaku buceso nizya kaimba antoomwe nkabela bana ba Leza bakaongolola nkambo ka lutangalo.”

⁹⁰ Nda kali a Nguwe cindi Na kaita Abrahamu kaala myaka ili—ili makumi ali ciloba ayosanwe yakukomena, a mukaintu wakwe kali makumi ali cisambomwe ayosanwe, a kumwaambilia kuti bakali kuyooba a muvwanda. Nda kali a nguwe cindi na kaimikila ali MBUBOBOOBU MBWAAMBA I MWAMI wakwe, “Ndi yooba a muvwanda.” Nda kaimikila anguwe. Onse umbi Munakristo wakaimikila a nguwe. Nda kali anguwe cindi masukusyo akwe nakasika. Ndali a nguwe akainka atala lya mulundu, kuyo tuula Izaka. Nda kali anguwe cindi mugutu wambelele wakalibonya.

⁹¹ Nda kali a Josefa cindi ba kakakwa a babunyina, nkaambo wa kali simuuya nkabela bamwi babo bakali basinyama. Nda

kali a nguwe cindi na kaziba sampu ndya keelede kwiminina kuli babunyina bakwe. Obo mbwa kabede, Mbwe bede. Obo Mbwe bede, wa kali obo. "Nkambo tuli bomwe tonse muli Kristo Jesu." Nda kali a Josefa mu mpangala yakwe, cuumbwe. Nda kali a nguwe cindi nakainka nkoonya ku janza lyá Farao. Wa kalizibya a nguwe.

⁹² Nda kali a Jakobo obo busiku cindi ba kasinana a Angelo busiku bonse. Nda kasinana, lwangu. Ndi lizi omo mwakainda. Aboobo Nda kasinana antomwe a Jakobo ciindi nciconya na kacita, nkambo Ndili munyina wakwe.

⁹³ Nda kali a Musa cindi nakainka kumusanza mu Egepita. Nda kali a Musa ku citeo ciyaka mulilo. Ikuti na uli Munakristo, ula lizibya a basyakacite ba Bbaibbele. Muta cilubi! Nda kali a Musa cindi bonse bantu niba kamulwana. Nda kali a Musa cindi na kazabuka Lwizi Lusalala. Cindi naka tambika janza lyakwe akweenda kuya kumbele, nkabela Lwizi Lusalala lwaka julika, Nda kalizibya muli Kristo mpoonya awo, elyo Nda kali a Musa ku oora eelyo.

⁹⁴ Kufumbwa oko Banakristo nkoba kabede, kufumbwa oko basyomi nkoba kabede, musyomi onse eno ula lizibya a muntu oyo nguonya. Kufumbwa mbo cibede, weelete kulizibya. Muta cilubi eco. Cindi mwa cicita, ujisi amunesia wa kumuuya; mwa luba kuti ndinywe bani.

⁹⁵ Eno kulizibya a nguwe, a Musa, cindi na kazabuka lwizi.

⁹⁶ Nda kali a Eliya mu mazuba a Ahabu, cindi niba bakasala oyo ngo bakeelede kubelekela, Leza na Balamu. Twa kali a nguwe a Cilundi ca Karimeleki, cindi na kabamba kusala oku, nkambo tula lizibya mu Mubili wa Leza nguonya oyo ngwa kalizibya mukati. Aboobo ikuti na twa lizibya mu Mubili oyo, nkokuti twe elede kuyeeya kuti twaali a nguwe okuya. Mbo mbubo.

⁹⁷ Eno, Nda kali a Davida, cindi na kakakwa a babunyina bakwe beni. Nda kali a Davida; mwa kaliko, anywebo, ikuti na muli Banakristo. Mwa kalizibya mu kukakwa kwakwe.

⁹⁸ Nda kali a bana Bahebrayo, mu bbila lyamulilo uyoosya, cindi i—i mulilo niwa takakonzya kubaumpa nkaambo ka Busyu bwa Muntu wane.

⁹⁹ Nda kali a Daniele, mu bulyango bwa balavu. Nda kalizibya omuya, cindi Angelo wa Mwami nakamuziba omuya.

¹⁰⁰ Nda kali masimpe nconzyo a Nguwe ku Kalivari. Nde elede kulizibya a Nguwe aa Kalivari. Nde elede kuba okuya ku busena, kuti, oko akwalo Nkwe takali zibya a Nguwe ku Kalivari, Nda kafwa a Nguwe aa Kalivari. Munakristo onse weelete kufwa a Nguwe a Kalivari. Ikuti na tofwi a Nguwe a Kalivari, to konzyi kuba Wakwe. Nda kaliko cindi Na kafwa. Nda kafwa a Nguwe. Elyo mpawo Nda kali a Nguwe cindi na kabuka kuzwa ku

bafu. Nda kayutuka kuseeni lya Pasika a Nguwe, mu bubuke. Kufumbwa Nca kacita, Nda kali a Nguwe nconzyo; musyomi onse wakali mbubonya.

¹⁰¹ Elyo eno Ndili kkede a Nguwe mu Masena Aakujuju muli Kristo Jesu, a inguzu zyonse zya gehena zyakazundwa, kwiinda muli Nguwe. Onse Munakristo wakali kkede mbubonya, nkaambo weelede kulizibya.

¹⁰² Lino Nda lijana lwangu, mu mazuba aya akumamanino, a banji Banakristo basyoma, balizibya mu mulimo Wakwe. "Ngu mbobuca nguwenya, sunu, amuya myaaka." Nda lijana lwangu, mu buzuba obuno, kulizibya mu mulimo Wakwe. Sena ulijana boobo, ku cisayoma, kweenda a ncico? Amubone, milimo Nja kacita, Wa katи musyomi uyo cita cintu nciconya. "I milimo Nje cita myuo icita anywebo." Mpawo sa inga walizibya a Nguwe? Mpawo cindi sampu lyasika ku Ijwi, sa inga waimina sampu mbuli Mbwa kacita, wabona, kuizibya a Nguwe? Nda kalizibya a Nguwe.

¹⁰³ Nda kali a Nguwe aa Buzuba bwa Pentekoste. Nda kali a basikwiiya kutala okuya, kalizibya a mbabo mu lubbizyo lwa Muuya Uusalala.

¹⁰⁴ Nda libuzya ikuti na mbungano tai isi amunesia munji eno kuti taba citi, bamwi babo, akwalo taba syomi kuti kuli cintu cili obo mbuli Muuya Uusalala. Mwabona na awo mbungano poi jisi? Cilwazi cibbi nciconya ca amunesia! Mwabona, baka luba kuti oyo wakali Jesu Kristo kaindi okuya. Ba kali lubide obo Jesu Kristo mbwa kabede. Ba kali lubide. Ba kali kuyeeaya kuti Wa kali buyo ii—ii sikupanga milao, na musinsimi, na ii—ii muntu mubotu. Ba kaluba kuti Wa kali Leza. Ba kaluba kuti Wa kali mbobuca nguwenya, sunu, amuya myaaka. Alimwi mbungano ijisi cilwazi cibbi ca amunesia ya kumuuya. Ba kaluba zintu ezi zyonse. Taba Ci mvwisyi limbi pe.

¹⁰⁵ Twe elede kuba a basikwiiya ku Pentekoste, kulizibya a mbabo. Nda kalizibya a nkambauko ya Petro aa Buzuba bwa Pentekoste, mu Incito chipati ca 2. Nda kacimvwa nca kaamba. Ndila cisayoma nca kaamba. Nda kacitobela nca kaamba. Lino Nda lizibya mu cintu nciconya.

¹⁰⁶ Muta bwezi amunesia ya kumuuya. Nkaambo, muya ku, muya ku lizibya lwanu a cintucimwi cimbi. Amukkale ncobeni a Ijwi eelyo!

¹⁰⁷ Twa kali a Mbungano cindi niya kalaililwa a Jesu Kristo, mu Incito, chipati ca 16. "Kamuya nyoonse mu inyika, akuyo kambauka Makanimabotu ku bantu bonse." Ndi yanda kulizibya okuya, "Yonse inyika, ku bantu bonse." "Ezi zitondezyo ziyo batobela a basyoma," bakonzya kulizibya muli ceeco.

¹⁰⁸ Ee, eno, mula lizibya a ceeco, na mujisi amunesia wa kumuuya, cakuti mujana kuti tamu syomi ezyo zitondezyo kutobela basyomi? Mwabona, ikuti na tamu cisayomi, nkokuti

mujisi amunesia ya kumuuya, mwabona, mwa kaluba kuti Leza waka syomezya ceeco. Wa kati, “Ezi zitondezyo ziyo batobela a basyoma.” Muta cilubi. Tamu konzyi kuciluba akuba Banakristo. Mweelede kulizibya a ncico.

¹⁰⁹ Mweelede kulizibya a Musalali Johane chipati ca 14, kampango ka 12. “Oyo uusyoma a Ndime, milimo Nje cita uyo icita awalo.” Muta cilubi. Ikuti mwacita, nkokuti mujisi amunesia ya kumuuya. Mwa luba mbo mubede. Mwa luba bumboni bwanu nco bwaamba.

¹¹⁰ Ino kujatikizya, Wa kati, “Ikuti na mwakkalilila muli Ndime, nkabela Ijwi Lyangu muli ndinywe, inga mwalomba eco nomu yanda nkabela ciyo citilwa ndinywe”? Sa mula lizibya awo, ku syoma kuti obo Mbwini? Marko 11, cindi Na kati, “Ikuti na waambila dundu eli kuti, ‘ko zyuka,’ akuta zumbauzya mu moyo wako, pele kusyoma kuti eco ncoamba ciyo citika, inga watambula eco ncoamba.” Sa inga walizibya alya, kusyoma kuti obo Mbwini? Ikuti na takuli obo, nkokuti ujisi amunesia ya kumuuya.

¹¹¹ Elyo—elyo wakaluba, waka weekelwa kusitikila kwako kwa Bunakristo. To konzyi kuziba oko nko zulilwa. Yebo wati, “Ndili muna Methodisti. Ndili muna Baptisti. Eco Nce zyi kujatikizya ncico. Ndili muna Pentekoste. Ndili obu, obo, na uumbi.” Ko langilila! Eco ndiza caamba kuti cizibyo ca bulwazi cilatondezegwa ali nduwe, kuti ujisi amunesia ya kumuuya.

¹¹² Yebo wati, “Ee, Mukwesu Branham, Ndila—Ndila cisyoma eci, alimwi Nse—Nse citi . . .” Lino kolindila buyo aniini. Ikuti na Leza waka syomezya kucita zintu ezi, akwaamba kuti ziyooba mu mazuba akumamanino, nkabela kayanza kako kayo kutantamuna kuli nzizyo, eco ncizibyo cibotu kuti Nda konzya kubona cizibyo ca bulwazi ali nduwe. Ngu amunesia ya kumuuya. Wa kaluba kulizibya omwini a Ijwi.

¹¹³ Yebo wati, “Nse syomi kuti baciswa baya kuponezegwa.” Ujisi amunesia ya kumuuya.

¹¹⁴ Yebo wati, “Nse syomi mu lubbizyo lwa Muuya Uusalala.” Amunesia ya kumuuya!

¹¹⁵ Yebo wati, “Nse—Nse syomi kuti Leza waka syomezya kucita ezi zintu mu mazuba akumamanino.” Mpawo waka swiilila ku kayanza, na njisyo imwi, mibusena bwa Bbaibbele. Ujisi amunesia ya kumuuya. To zyi oko nkozulilwa mpawo. Yebo ulyaamba kuba, “Munakristo,” kakuli ukaka Ijwi. Kukujosya nkoonya ku amunesia ya kumuuya alubo, mwabona, tozyi awo mpoimvwi. Ujisi amunesia ya kumuuya. To konzyi kuli zibya omwini a Magwalo.

¹¹⁶ We elede kuba a basikwiya. We elede kuba a Lugwalo lonse, a Mbungano cindi niya kalaililwa. Pele, eno, cindi Mbungano niya kalaililwa kuti, “Kamuya mu inyika yonse akuyo kambauka Makanimabotu; ezi zitondezyo ziyo batobela abo basyoma,”

oko kwakali kulaililwa kwayo. Eno bali jisi...Oko kwakali kulaililwa.

¹¹⁷ Pele ba ciswa cilwazi cibbi ca eyi amunesia ya kumuuya, mbuli buyo Eva mbwa kaba i... ali nguwe, konse kwinda mu muunda, buzuba bomwe. Eno ili mbuli Israyeli, iciswa bulwazi obu mbubonya, cikoolo cizwa ku zilyo zya seminari ciyo kupa amunesia ya kumuuya. Jana zilyo zya seminari, nkabela uyo jana cikoolo, alimwi mpawo, cintu citaanzi ulizi, uyo ciswa amunesia kapati. To syomi cili conse Bbaibbele nco lyaamba.

¹¹⁸ Eelyo nde penzi ku mbungano asunu. Eelyo nde penzi nco tu takonzyi kuba a lubukuluso asunu. Eelyo nde penzi ku bantu asunu. Ba kadonsela atala lya makala loko azintuzyonse, alimwi konse kalengwa kabuzumini ako kakonzya kukonkolwa, kusikila tabazyi ciluleme a cilubide. Mbombubo. Tai konzyi kuyeeya Mwami wakwe. Tai konzyi kuyeeya Ijwi Lyakwe. Tai konzyi kuyeeya cisyomezyo.

¹¹⁹ Eelyo nde lyakali penzi a Israyeli, cindi Jesu nakasika a cilao. Tiiba kakonzya kuyeeya, kuti, “Ii nakalindu uyo mita.” Tiiba kakonzya kuyeeya kuti Musa wakati, “I Mwami Leza wanu uyo busya Musinsimi uli mbuli Ndime.” Ba kajisi amunesia ya kumuuya.

¹²⁰ Eco nce ncico ncobeni mbungano ncoi jisi asunu. Wa kati, “Kuyo citika mu mazuba akumamanino,” kuti ezi zintu ziyo citika, nzo tubona kacitika, nkabela mbungano uli kkede buyo cakufwa mbuli twelufu okuloko. Ino ncinzi? Amunesia ya kumuuya. Tu liita kuti ba Pentekoste, a kutakonzya kulizibya, a kuta konzya kulizibya lwesu mu Ijwi cindi ni Lya kakambaukwa mu nguzu zya bubuke bwa Kristo; a Nguwe okuno akati kesu, ku cicita, akucita nciconya eco Nca kaamba kuti Ciyo cita. Mpawo, amulangilile, ciyanza cakabungwe caka tunjizya mu amunesia ya kumuuya. Tula penga. Ta tuzyi oko nkotu zulilwa. Umwi ubweza mapepa akwe kuzwa ku mbungano *eyi* kuya ku mbungano *imbi*, alimwi *eyi* mbungano, alimwi *aka* kalengwa kabuzumini alimwi *ako* kalengwa kabuzumini. Mwabona?

¹²¹ Cintu ncotu yandikana, alubo, ngu Amosi umbi kusika a cilao, kajisi MBUBOOBU MBWAAMBA I MWAMI. Sa inga twa mutambula? Kujatikizya mbuli noba kacita. Tiiba ka mutambula. Inga teeba mutambula sunu. Ta konzyi kubikka mutwe wakwe mu busena, pee, ku kambauka. Lino, mbo mbubo ncobeni, nkaambo mbungano iciswa eyi amunesia ya kumuuya.

¹²² Eno, nkaambonzi? Leza waka syomezya mu mazuba aya akumamanino, “Cindi Mwana wa muntu aku yubununwa,” kweendelana kuli Luka, chipati 17, “ku citondezyo eco cakali kucitika ku Sodama, ciyo citika alubo.” Elyo bantu bala cibona kacicitwa, nkabela bamwi babo taba cisyomi akwalo. Ba yeeya kuti nkubala mizeezo. Ba yeeya kuti muuya wa dyabulosi. Ino ncinzi? Ba ciswa amunesia ya kumuuya. Obo mbombubo.

Taba konzyi kumvwisya Mwami. "Jesu Kristo ngu mbobuca nguwenya, sunu, amuya myaaka." Obo Mbwa kabede kaindi, Mbwa bede eno.

¹²³ Pele, ncinzi cakacitika, ta tukonzyi kuli zibya limbi a Ijwi. Nkaambonzi? Tai, tai zyi naa yalo ncisangabalilo na yalo ni mbungano. Tai yandi kwiipta kuti ncisangabalilo, alimwi tai konzyi kwiipta kuti mbungano; nkaambo, ku kwiipta kuti mbungano, inga ya lizibya a Kristo. Oko kwiipta amunesia ya kumuuya. Alimwi tai yandi kwiipta kuti ncisangalalilo. Aboobo taili mbungano ya Pentekoste, mbungano ya Methodisti, mbungano ya Baptisti; ncisangabalilo ca Pentekoste, cisangabalilo ca Methodisti, a cisangabalilo ca Baptisti, nkaambo tai konzyi kulizibya a Ijwi. Elyo cindi Ijwi lyu yubululwa, taba Li syomi nekubaboobo. Mbulwazi bwa amunesia ya kumuuya. Konzyi kulizibya beni; tabazyi nkoba zulilwa. Mbo mbubo.

¹²⁴ Cili mbuli nconzyo kutintanya cintucimwi. Mbuli Mbwe kaamba kanji kuti, "Nda kali kuyeyya lyoonse cimwi ca zintu zifuba loko Nce kabona kakali kambongolo." Mwabona, ka katintanisigwa. Mwabona, nyina yakali mbizi mpwizi, wisi kakali kadonki, nkabela ta kazyi akwalo nkoka zulilwa. Elyo cintu citaanzi mulizi, inga—inga—inga mwa katintanya a kujana kadonki, elyo mpawo...na kujana kambongolo, pele kambongolo takakonzyi kuli zyalulula. Mwabona, ta kakonzyi. To konzyi kukayiisya cintu. Ta kakwe bunyone ku mizeezo. To konzyi ku kaambilila cili conse...Inga wabamba a matwi mapati malamfu. Alimwi kaya kulindila mane buzuba bulamfu kwinda mu buumi bwako, ka kataninga akufwa, ku kubbansa. Kwa mana. Lyoonse kalindila cintucimwi kubbotokela aali nduwe, ikuti na kala konzya.

¹²⁵ Elyo eco cindibikka mu mizeezo ya bunji bwabategwa Mbanakristo bakatintanisigwa. Bala itintanya mbungano kusikila yajata bulwazi bwa amunesia ya kumuuya. Taba konzyi kuzyalulula cintu alubo.

¹²⁶ Ba laambaula kujatikizya mapopwe akatintanisigwa. Mapopwe akatintanisigwa taali cintu. Ncintu ciinda kubija ncoka sola kubikka mu mukanwa lyako, kufumbwa cintu cakatintanisigwa. Ako nke kaambo mweelede kubweza otu tutsyango tuniini twa mubube bukomezya kufwambaana, a zintu zyakatintanisigwa, a kuzifwafwaza aku zisilika akubebeka. Nkaambonzi? Nkaambo ta tukonzyi kutantamuna buuka kuzwa kuli ntuto.

¹²⁷ Pele musyobo, wini uunjoloma, toeleda kufwafwaza musamu. Uli jisi Nguzu mukati kanguwo, ku kutantamuna buuka kuzwa kuli nguwo. Eco nce citola kugwisya buuka bwa kutasyoma kuzwa ku muntu wini nconzyo simuuya.

¹²⁸ Bweza kambongolo kakaindi, nkabela waunka kuyo ambaula kuli nkako, akuti, “yawe, mulombe, Ndi yanda kuti ucite *ceeci, eco.*”

¹²⁹ Kayo kkala alya akuti, “Hamu! Hamu! Hamu!” Alo matwi mapati kaapakamuka atala ansi. Nda kababona ii—ii banji Banakristo bali mbuli boobo, taitwa.

¹³⁰ Yebo wati, “Jesu Kristo ngu mbobuca nguwenya, sunu amuya myaaka. Ezi zitondezyo ziyo batobelabo basyoma.”

¹³¹ “Hamu? Ndi syoma kuti mazuba aa maleele akamana. Hamu? Hamu? Hamu?” Mwabona, ta zyi eco cakusyoma. Ta zyi cintu. Ta zyi oko nkwa kawzida; ta zyi oko nkwaya. Ujisi amunesia ya mbizi. Ta zyi oko nkawzida, alimwi ta konzyi kusakana.

¹³² Pele Ndila uyanda musyobo wini unjoloma. Oh, uli bateme. Inga waambaula kuli nguwe. Uli bazyi bawisi kuti bakali bani, kuti manyina bakali bani, abo bakali basyanyinakuli a banyinakulu. Ujisi mapepa akuzyalwa ku musyobo omwe utondezya nkwa zwida.

¹³³ Elyo Ndila tuyanda Munakristo wakazyalwa kuzwa ku musyobo omwe, ukonzya kwiinka lweendo lonse kujoka ku Ijwi lya Leza, kuya ku buzuba bwa Pentekoste, a kulizibya beni okuya a basalali, oko Nguzu zya Muuya Uusalala nkozya kabawida. Oyo ngo Munakristo wakazyalwa kumusyobo omwe. Uli zyi oko nkawzwa. Ta lizibyi a Methodisti, Baptisti, a cintu cimbi. Ula lizibya mu Ijwi lya Leza. Uli zyi nconzyo awo mpaimvwi. Bulowa bwa bwami ibwa Wisi bula kunka muli nguwe; Bulowa bwa Jesu Kristo. Uli zyi eco Neo zicita! Ula lisyoma Ijwi lyoonse. Leza ulabeleka kwinda muli nguwe a kuli simpikizya ku zitondezyo Nzya kasyomezya kutobela. Ta jisi amunesia ya kumuuya. Walo musyobo wini unjoloma. Nda ciyanda eco.

¹³⁴ Pele mbungano asunu ijisi cilwazi cibbi ca amunesia ya kumuuya. Tai zyi nkoizulilwa. Ya kaluba konse kujatikizya Nzi zyo, ya kaluba zyonse zintu ezi ziibamba kuba Mbungano.

¹³⁵ Ncinci caka tubamba kuvuba kapati mbuli mbo tubede? Ya kasika mu busena bwa Laodikeya alubo, kujoka mu busena obo buvubide mbuli Israyeli mboya kabede. Cindi niya kali ncete a kusyoma Leza ku zintuzyonse nzoya kali kukonzya kucita, zintuzyonse nzoya kajisi, ya kasyoma Leza; mpawo Leza wakali anjiyo, alimwi yakali yamuuya, alimwi yaka zumanana. Pele cindi niya kavuba, nceeci cakacitika: miinzi yabo yaka yakwa, alimwi banakazi bayo bakaba basibwaamu, bamaalumi babo baka cizumizya, bakambausi babo bakalosya micinjili, nkabela baka sampaula basinsimi. Alimwi oyo ngo musyobo wa ciimo ngoba kanjila. Ncintu caka citya ceeco, kwakali kuluba zilongezyo nko zyakazwida.

¹³⁶ Elyo noba Methodisti, anoba Baptisti, anoba Presbyteria! Nobana Methodisti inga mwa muyeeya John Wesley. Noba

Baptistii! Alimwi John Smith wa koomokela makani a bantu kusikila mukaintu wakwe wakali kumu solela buyo kuya ku tafule, meso akwe akajala kukuzimba, kuzwa kukulila akukomba masiku onse. Ino ndipenzi nzi?

¹³⁷ John Wesley wa kaamba cimwi ca zintu zipati... Nda syoma wakali umwi wa matata mataanzi a Methodisti wakati, "I mause a bana basimbi ba mbungano ya Methodisti, kwakali kutalika kuba banyika, ba kali kusama nweenwe ku minwe yabo." Ino inga mwaamba inzi sunu, kabasamide zigonkolole?

¹³⁸ Ncinzi cakacitika? Amunesia ya kumuuya. Mbo ibede nconzyo, kuluba oko nko kazwida. Mu jisi zyaonse zintu ezi nkaambo ka bubotu bwa Leza, bubotu bwa kamucitila.

¹³⁹ Sena muyeeya kuti eci ncitu ceenzu? Cili mbubonya ku Muuya wa Jesu Kristo, cisinsime. Mu Ciyubunuzyo, chipati ca 3, ca kati, "Nkaambo waamba kuti, 'Ndili vubide, taakwe Nce bula,' nkabela tozyi kuti uli mucete, moofu, upengede, usampukide, sicinswe, nkabela to cizyi" Mwabona, to cizyi! Ino ncinzi? Amunesia ya kumuuya. Taba izyi.

¹⁴⁰ I mambungano ali jisi i—i mali eno. Taakwe mbungano, noiceya, mu cisi, yakabungwe, pele ili jisi mamillioni taimuzi mamillioni aa madollar. Ayaka mayake a mamillioni a mamillioni aamadollar a zintu, akukambauka Kuboola kwa Mwami kuti kuli afwaafwi. "Avubide," a kuti 'Taakwe nce bula.' Bakambausi babotu bayiide mbo bakasola kuba abo, bazyi buyo lwiyo lwabukombi kwinda mbo bakasola kuziba. Alimwi bajisi mayake mapati maningi, masena mabotu maningi asalidwe mu dolopo. Ba jisi nzila iluzi kuli conse noba bayanda kucita. Elyo mpawo bakacita nzi? Baka jana amunesia ya kumuuya a kuluba kuti wakali Leza waka kabacitila ceeco, mbubonya mbuli Israyeli.

¹⁴¹ Elyo Bbaibbele lya kasinsima, Jesu Kristo wakatuma angelo Wakwe kuli Johane akuti, obu bukkalo bwamamanino bwa Laodikeya kuti buya kuba a amunesia ya kumuuya. Ba kali "pengede," amuyeeye. Ba yeya kuti mbalemu. Ba yeeya kuti bajisi cintucimwi. Pele Wa kati bakali "sampukide, bapengede, bacete, boofu, basicinswe, nkabela taba cizyi." Elyo taakwe nzila ya kubaambila.

¹⁴² Eno, ikuti na muntu abusena awa mu kagwagwa, usampukide, na mwanakazi, sicinswe, mu kagwagwa, moofu, eco inga caba ciimo cifwisya nsoni mu ciimo eco. Pele mpawo ikuti na bakali kkwene mu mizeezo, bakalizi kuti bakali bani, kuteeti bakali bantunsi, alimwi ba keelede kusama zisani; ee, wa unka okuya; balo—baloo bantunsi, beeledo kulizibya a mukowa wabantu; alimwi okuya, "bapengede, basampukide, boofu, a basicinswe." Elyo wa mwiinkila, kwaamba kuti, "Mukwesu, ula cinswe."

¹⁴³ “Eno, mpaawa! Ndili Mwiyi *Niini-a-niini!* Ko langanya buyo ncito yako. Nda kwaambila, Ndi zulilwa kuli *Boobu-a-boobu!* *To jisi ncito, omubumbulusi uusalala, ku ndaambila cintu!*” [Kabeeela katakwecintu aa teepu—Mul.]

¹⁴⁴ Ba ambile, “Ta ciluzi ku muntu kucita ceeci, alimwi ku bantu kucita zintu nzoba cita.”

¹⁴⁵ Bayo kuzibya kuti mukambausi wabo wa bulubusi. Mwabona? Ino ncinzi? Nei, ba kaluba milao ya Mwami Jesu. Mpawo Ase luke akucita zitondezyo a zigambyo Nzya kaamba kuti Uyo cita, taba yandi kucisyoma. Ngu amunesia ya kumuuya. Mwabona, ba kaluba! Alimwi bali cinswe, nkabela taba cizyi, taba cimvwisyi.

¹⁴⁶ Ba yeeya kuti, “Nkaambo buyo kakuti Ndi zulilwa ku mbungano, nku konse kuyandikana.” Oh, mukwesu, eco caamba buyo kuli Leza mbuli kuba Muyasi wamabwe na cili conse cimbi, kufumbwa cimbi cisangabalilo. Ku zulilwa ku mbungano, eco ta caambi cintu kuli Leza.

¹⁴⁷ Mweelede kuba bana ba Leza basankwa abasimbi. Mweelede kuzyalwa kwa Leza, alimwi Leza ndi Ijwi. Cindi Nda ba cibeela ca taata, Ndi ba taata wonse. Cindi waba cibeela ca Leza, uba Leza, mu buzule. Ijwi Lyakwe lyoonse, ula Li syoma lyonse.

Amunesia ya kumuuya!

¹⁴⁸ Ino kuti tokazi zina lyako mbo lyakabede? Elyo ikuti na uli, uya kusika kuzwa ku mukwasyi mubotu, oyo Ngwe syoma kuti ulacita, ikuti na uzwa ku mukwasyi mubotu wa bantu, alimwi ino kuti wa kaluba zina lya mukwasyi, alimwi wainka abusena awa, kopona camause? Ba lati, “Sa zina lyako ngu Jones,” na kufumbwa mbo lyakabede. “Ee, Nse zyi na Nda kali ni.” Mwabona? Yaa, mwabona, eco ncintu ciyoosya kuba, ciimo ciyoosya caku njila.

¹⁴⁹ Ee, awo mpa busena mbungano mpoibede. Yeelede kuba iiminina Jesu Kristo. Pele yaka ciluba eco, nkaambo ijisi, yaka njila muli ncico, tunsiyansiya a tubungwe, ezyo nzeba kazumina mubusena bwa Ijwi. “Elyo bali cinswe, boofu, basampukide, nkabela taba cizyi,” nkabela taakwe nzila ya kubaambila.

¹⁵⁰ Kwayanda nsekabi mu Birmingham alubo, pele eci nce ciindi cimwi nobaya kucimvwa. Mwabona? Mwabona? Mbubo. Ndi buyo... Nse jisi ncito cita kubyala Mbuto. Leza ula Ila ilila ku busena oko Nko yeelede kuya.

¹⁵¹ Kaluba, iyi, ba kaluba Ijwi lya cisyomezyo. Ba kaluba. Israyeli yakali mu musyobo oyo wa kubambwa cindi Jesu nakasika. Ya kali lubide. Ba kalanga, oh, ba katibakali kusyoma kuti kuli kuboola kwa Mesiya. Pele cindi Mesiya nakasika akulizibya Mwini ku Ijwi, ba kajisi tunsiyansiya tunji loko kusikila baka bambide Ijwi lya Leza kubula nguzu.

¹⁵² Alimwi Jesu waka syomezya, kuti kakutanaba buyo ciindi camamanino, “Mbuli mbo kwakabede mu Sodoma, mbubonya mbo kuyooba.” Elyo kuyo lizibya, nkabela bantu bakaba basintunsiyansiya kapati kusikila baka bamba cisyomezyo ca Leza kubula nguzu, kwinda ku kansiyansiya kabo. Amunesia ya kumuuya! Amunesia ya kumuuya ili boobo nconzyo. Mwabona, ba kaluba zintu ezyi.

¹⁵³ “Oh, Ndi zulilwa kuli *eyi*. Nda—Nda kacita *ceeci*. Nda kazyana mu Muuya. Nda kacita *ceeci*.” Ee, ma, ma, eco tacikwe cintu ancico, pee.

¹⁵⁴ Mbobuti mbo konzya kuba Munakristo a kukaka Ijwi? To konzyi. Leza ndi Ijwi. Ikuti na Ijwi lili muli nduwe, yebo a Ijwi muli bomwe. Koonse Ijwi mboli bede, uli boobo. Ameni. Ikuti na Ndi kkala mu nzyalani eyi, calo eci caabilo ca Ijwi caka syomezegwa ku nzyalani eyi, Nde elede kuba obo. Ikuti na Ndi yooba Munakristo, Nde elede kulizibya a konse Bbaibbele nkoli kambauka a kwiiminina.

¹⁵⁵ Aleluya! Mula ndiita kuti mubumbulusi uusalala, nekuba, nkabela Ndili mvwa bukombi loko ndyoonya lino. Iiyi, munene.

¹⁵⁶ Nde elede kulizibya a zintuzyonse ezyo Bbaibbele nzoli taminina. Elyo Lipa kutaminina, alimwi, ikuti na Nse kaumwa a amunesia wa buzuba obu busyaasunu, Ndi yooba akukonzya kulizibya a Ndilayo. Ikuti na Nda Li kaka, nkokuti Ndi jisi amunesia; cintucimwi cacific, Nda zumina kayanza kabuzumini na njisyo, na mbungano imwi na nkamu ya bantu. “Nse konzyi kucicita,” cindi kakuli Ijwi lilasika a kulizibya Lini.

¹⁵⁷ Nke kambo Jesu taka zibwa. “Oh,” ba lati, “ee, oyu muntu ulasalala, a mupaizi wesu uusalala, wesu uusalala *oyu*.”

¹⁵⁸ Elyo Jesu wakati, “Muli bauso wanu, dyabulosi, nkabela milimo yakwe myuo icita.”

¹⁵⁹ Sena mwakalizi kuti Kaini wakatuula cituuzyo cibotu, awalo? Wa kali sinizizye, wakayaka cipaililo, wakafugama a kukomba, a kutuula cituuzyo, a kukomba kuli Leza. Elyo ikuti, Leza, nku konse Leza nkwayanda, kuli nduwe kuzulilwa ku mbungano a kuba acipaililo, a kupa kwakkumi kwako akuya ku mbungano, a kupona buumi bubotu; ikuti na nku konse Nkwa yanda, Ta kaluleme kutapatila Kaini, nkambo wa kacita cintu nciconya. Iiyi, munene. Obo mbombubo.

¹⁶⁰ Pele *bukombi* caamba “civumbyo,” alimwi to konzyi kuvumbwa kubellesya milimo yako omwini. Kuli cintu comwe luzutu Leza ncaya kuzumina, nkabela obo Mbulowa bwa Jesu Kristo. Eco nce civumbyo cilikke. Aanze lya Ceeco, ikuti wat, “Kobamba kayanza kabuzumini,” amunesia ya kumuuya! Nce caka citika.

¹⁶¹ Lino amubone, baka liluba Ijwi lyabo. Ba kaliluba Bbaibbele. Ba kaciluba cisyomezyo. Ba sola kupona mu

kubalama kwa obo Methodisti mboya kabede, obo Baptisti mboya kabede, obo muntuumwi umbi mbwakabede. Nceeci cisyomezyo ca buzuba, alimwi Leza ka Caamba kwinda mu Ijwi Lyakwe, akusimpikizya alubo a kutondezya kuti Cili boobu, elyo taba Ci syomi nekubabobo. Amunesia ya kumuuya! Mbo mbubo ncobeni. Amunesia, ukkwene, ukkwene, nconzyo taba Ci syomi pee.

¹⁶² Musooja muna Frenchi. Nda kaambilwa kaano; katutaninga jala. Nse zyi kuti akwalo kwali kumuka boobu, alimwi Ndi jisi mapeegi atandila ku kkumi awa asyeede; njo cibweza ciindi cimbi. Amubone, musooja muna Frenchi. Baka jisi nkamu ya bamasooja mu ciimo campi, nkabela baka jisi eyi amunesia. Kuzwa ku kulebuka, mu nkondo. Elyo baka jisi bamambe, alimwi ba—ba katumina akulekela bantu abo bakasweekelwa bayandwa babo kwiita a kubona na bakali kukonzya kubaziba aba balombe. Kwakanyina bulangizi kuli mbabo, ndiza omwe na bobilo, kuzwa kuli nkuko, ka cijata. Elyo mpawo baka bweza bamwi babo, bakali kuyo babikka mu oko nkoba keelede kukkala boonse buumi bwabo.

¹⁶³ Ba kali kuya butanta lubazu lwa cilundu, kwiiya kudonsa; nkabela bakaimikila a stashioni, kulekela balombe kuzwa kuti boolole maulu abo. Elyo balindizi bakainka a cilundu, kuyo balangilila, nkaambo ka amunesia, baa, ba—ba kacita kubeeleyza.

¹⁶⁴ Aboobo bakeebeleyza umwi mulombwana mukubusyi okuya, wa kazwa akutalika kulanga konse ku tanki lya meenda, wakalanga koonse kutala lya cilundu. Wa kapukuta busyu bwakwe, nkabela wa kalungula. Elyo wa kalanga alubo, nkabela wa kabone eelyo tanki lya meenda. Wa kalanga koonse ku stastioni, nkabela wa katalika kweenda. Mu busena bwakuti mulindizi kamwiimikizya, wa kamutobelwa.

¹⁶⁵ Wa katanta cilundu, kuselemuka kazila kaniini, wakanyonena ku lulyo akwiinka atala lya cilundu cimbi ciniini, elyo wakasika ku kaanda kaniini kazisamu. Wa kalanga. Wakali kuzwa mu kkota, wakali mudaala waka jisi nkoli mu janza lyakwe, wakazwa akumu gwambatila. Kati, “Omwana wangu, Nda kalizyi kuti nokabweeda. Ba kandaambila kuti wakali fwide, pele Nda kalizi kuti nokabweeda.” Elyo mulombe waka pempenukwa. Amunesia yakwe yaka musiya. Wa kakonzya kuliziba kuti wakalini. Wa kaziba kuti bakali bawisi.

¹⁶⁶ Oh, musooja wa Ciingano, oyo wa kalebuka nkambo kakwiya maningi, kulebuka kunji kwa kabungwe a kayanza kabuzubi, a zintu zya inyika, nkaambonzi totaamukili ambali maminiti masyoonto akuunka kuya bulanga moonse mu Bbaibble? Inga wagambwa konse, alimwi inga walijana kulizibya omu mu Ijwi, mbuli musyomi, bumwi bwa mazuba aya. Antela inga wa Mu ziba. Inga wa mpempenukwa kuliziba

omwini, mbuli mwana mutaka mbwa kacita, akulijana omwini. Inga wajana kulizibya kwako mu Majwi aa Leza.

¹⁶⁷ Umwi wakati, buzuba bumwi, kutali ciindi cilamfu cakainda, wakati, "Pele, Mukwesu Branham, kotulanga tobantu ba Pentekoste, ino mambungano mabotu nge tujisi. Baa, swebo, tu jisi bakutausi abo bakaaisigwa."

¹⁶⁸ Amuswiilile, cindi mwaalumi akwata mukaintu, ta syomi mu bweebesi bwakwe. Peepe. Walo usyoma mu kusyomeka kwa cikonde cakwe, majwi akwe. Ta syomi mu bweebesi bwakwe. Walo usyoma mu kusyomeka kwakwe.

¹⁶⁹ Eyo nje nzila cindi wakwatwa kuli Leza, tosyomi mu mbungano imwi mpati yeebeka njo konzya kuyaka, pele mu cisyomezyo eco Jesu Kristo nca kapa, kuti, "Ndime mbobuca nguwenya, sunu, amuya myaaka." Sena mula syoma obo?

Atu kotamike mitwe yesu asyoonto buyo.

¹⁷⁰ Nda libuzya, sunumasiku, mu buyake omuno muli bantu bakkede, omo muli baalumi a banakazi bali mbantu Batamani, buya ku Butamani, alimwi mulizi kuti buzuba bumwi na bumbi myua kuyandika kuswaana Leza. Elyo Nda libuzya ikuti na waka jisi kuyoya kuniini kwa amunesia oyo, alimwi inga wa... Wa kalizibya mu cintu cita luzyi, alimwi yebo-inga yebo baanga wagambwa moonse, sunumasiku, akujana kuti to konzyi kulizibya muli Kristo Jesu? Walombwa utambike janza lyako mujulu akuti, "Kondi kombela, Mukwesu Branham, Ndi—Ndi yanda kulizibya mbuli Munakristo wini, musyomi wini." Leza aku longezye. Leza aku longezye. Yebo ulelekwe! Oh, iiyi, kunze konse. I Mwami Leza amu longezye.

¹⁷¹ Muntuumwi atala mu bbalukkoni, yebo wati, "Mukwesu, Ndila syoma kasimpe kuti obo Mbwini. Ndila syoma, mbuli Banakristo, ta tuli Banakristo mbuli mbo twa kabede myaka yakainda."

¹⁷² Ino kujatikizya ndinywe nobantu ba Pentekoste, ciindi bamanyokwe a bamasuso nibakali kwiima mu tugwagwa awa, a kuuma nsaka yakaindi. Elyo banyoko, obo mbo bakali...ba kakatala, akupengaanina ndinywe nobana baniini. Ziindizimwi mwa kacita kweenda kakutakwe zisani, azintuzyonse zimbi, pele bauso a banyoko baka syomeka ku Kaambo, ku kujatilila kuli Kristo.

¹⁷³ Amulange eco noba Pentekoste nco mwakacita. Myaka ili makumi osanwe yakainda, mwa kazwa mu kabunga. Eco nce cimubamba kuba ba Pentekoste, mwa kalyandaanya lwanu kuzwa kuli batasyomi. "Elyo mbuli ngulube ku ntimba yayo, a mubwa ku malusi akwe," mwa kajoka akucita mbubonya, kabamba musyobo nguonya wa kunyongana mo mwakazwa. Ino ndipenzi nzi? Amunesia ya kumuuya yaka pasukila akati ka bantu. Mu jisi tuyanza twanu twabuzumini a mapepa anu aatubungwe eno, elyo muli antoomwe ncobeni a bamwi

babo, kuyanda kuba abamwi babo. Mwa kazumizya banakazi banu kugela masusu abo, kunana misila. Mu, mu bazumizya kucita zyonse zintu ezi, kuzumizya ezi zintu zyose mu i—mu mambungano. Ino ncinzi? Amunesia ya kumuuya.

¹⁷⁴ Mpawo, cintu citaanzi mulizi, cindi Leza atalika kuswaya akati ka bantu, mpawo ncinzi cicitika? Tamu konzyi ku citambula. Mwabona, mwa kaciswa kapati ku cilwazi ca amunesia eco, mwabona, cintu cilikke ncomwa kamvwa lyonse. Sena tuyeeya kuti mweelede kutantamuka ku kayanza ako kabuzumini kwa maminiti masyoonto a kusala Bbaibbele, a kubona obo Munakristo mbwaelede kulizibya? “Ezi zitondezyo ziyo batobelababo basyoma!”

¹⁷⁵ Incito, Petro wakati, “Amusanduke, umw aumwi wanu, akubbizigwa mu Zina lya Jesu Kristo ku kujatilwa kwa zibi, nkabela myo tambula cipego ca Muuya Uusalala; nkambo eci cisymezyo cili kuli ndinywe, a bana banu, abaabo bali kulaale, nobaba boonse Mwami Leza wesu mbaya kwiiita.” Ikuti ba mwaambila kuti Eco tacili booboo, nkokuti meembeli wanu ujisi cilwazi cibbi ca amunesia ya kumuuya. Ta konzyi mwini kulizibya a Mbungano eyo; kutali kabunga; Mbungano, Mubili uutamvugwi wa Kristo.

¹⁷⁶ Eno Muuya Uusalala mpali ano. Uli wano kukucita mbubonya buyo ezyo Nzya kasyomezya kucita. Lino kuciindi nomuli ano a mitwe yanu kiikoteme, amuzumanane buyo kupaila. Amulekela Muuya Uusalala ukanaane, Mwini. Alimwi mubone ikuti eci... Uli onse ulizyi obo, cisymezyo, obo mbocibede ca buzuba obuno. Lino nywebo nomujisi kubula, sunumasiku, nywebo, bunji bwanu mwatambika maanza anu. Kamutana kucita ceeco... .

¹⁷⁷ Nda libuzya, kuciindi notuli waano a kupaili nconzyo baciswa, Nda libuzya ikuti na inga wakonzya kutantamuka kuzwa ku kutasyoma oko, ako kabungwe, ako kayanza kabuzumini ka kwaambila ezi zintu kuti tazili booboo, oyo umwi unga wa kwaambila kuti Nca dyabulosi. Cindi bacita booboo, “Taba kajatilwi pe, mu inyika eyi na inyika iciza.” Ino kuti Obu Mbwini? Amuyeeye buyo, ino kuti Mbo mbubo, mpawo mulaali? Mwabona, to elede kucaamba antangalala; ko cisymoma mu moyo wako. Alimwi kuli bantu ano bacisyoma eco. Nda kakkala mpoonya awa, kwa masiku obilo amamanino, kubeleka kunsi lya cintucimwi, buyo, ma, kujatilila akulumalulimi lwangu, ku kasya kuciita mpoonya awo.

¹⁷⁸ Elyo yeeya, mwenzuma, kuli akati ka nduwe a Leza. Ino kuti cili lubide, elyo yebo koyeeya booboo? Yebo ulizi cicitika, toka jatilwi kuli ncico pe. Amunesia ya kumuuya, uyo njila ncobeni mu lufu lwako Lutamani, kutasyoma. “Oyo uusyoma tabetekedwe kale!”

¹⁷⁹ Eno kombela kuciswa kwako, akuti, “Mwami Jesu, Wa kasyomezya. Ndi . . .”

Ndiza kuli beenzu bamwi, batana sikide okuno.

¹⁸⁰ Jesu wakasyomezya, “Mbuli mbo kwakabede,” Ndila bweza Lugwalo lomwe, “mu mazuba akwa Lota,” cindi Leza naka yubululwa mu mibili wa buntu; a bantu, Abrahamu, nkamu yakasalidwe, nkamu yakaitidwe kuzwa. Elyo zina lya Abramu lyaka cincwa kuba Abrahamu, mpawo wa kabona Ijwi lyakaba mubuntu, elyo Ly a katweluka miyeeyo yakali mu moyo wa Sarah.

¹⁸¹ Alimwi cindi Lunyungu Lwabwami ilwa Abrahamu nilwakasika, nce ncico Nca kacita, elyo baka Mwi ita kuti, “dyabulosi.”

¹⁸² Wa kati, “Eno cindi Muuya Uusalala waakusika, uyo cita cintu nciconya.” Kati, “Eno kuli kujatilwa cindi mwa Ndi ita boobo, pele, cindi mwaku sampaula Muuya Uusalala, takukwe kujatilwa.”

¹⁸³ Eno inga Walo, mu Nguzu Zyakwe, wasika kwinda mu bbunga eli lya bantu, kufumbwa mpobede, alimwi kutweluka Kwakwe kwamuuya kutondezya kuti Walo ndi Ijwi. Kutegwa na kuli umwi awa uuciswa amunesia, kuteeti tabaka . . . baka ble ntamizyo, kumbela lya lwito lwaku cipaililo kwacitwa.

¹⁸⁴ Akube kuti Mwami Leza agwasye. Eno mitwe yanu kiikoteme, kupaila cakubatama.

¹⁸⁵ Mwabona, kuli mulindu uukoede awa kunembo lyangu. Unyamwide janza lyakwe kumeso akwe. Walo uciswa cilwazi ca moongola. Alimwi akwalo ujisi kulibilika. Walo ujisi penzi lya mwida. Alimwi uli kkede awa kumbele lyangu eno. Elyo inga waziba, ta zwi mu cisi eci. Walo uzwa mu dolopo litegwa Macon. Inzya. Sena ula syoma kuti Leza inga wandaambila kuti nduweni? Nduwe Muka Ayers. Ikuti na mbo mbubo, tambika janza lyako. Ndi mweenzu kuli nduwe. Obo mbwini, embo na? Eno penzi lyako lyamana. Jesu Kristo; waguma cikobela Cakwe. Wa kuponya. Eno ko cisyma buyo.

¹⁸⁶ Kuli mwaalumi uukkede kusule lya buyake. Walo uyandaaula lubbizyo lwa Muuya Uusalala. Walo uyanda lubbizyo ku Muuya. Uli imvwi awa kumbele lyangu. Ta zwi kokuno pe, akwalo. Walo uzwa ku Carolina, Charlotte. Lepoe ndi zina lyakwe. Syoma a moyo wako onse, nkabela Leza uyo kuzuzya Muuya Uusalala, mukwesu wangu-wangu, ikuti na ula cisyma.

¹⁸⁷ Awa, ku lulyo lwangu, awa kuli ii—ii mwaalumi a mukaintu wakwe nkoonya kunembo lyangu awa. Mbanabukwetene bakaindi, ku lulyo lwangu. I mulindu uciswa cilwazi ca mu mala. Mulumi wakwe ujisi penzi lya moyo. Taba bazwi okuno pe. Ba zwida ku Tennessee. Ba. a Muka. Thomas, ikuti na mula syomo a moyo wanu onse, amutambike maanza anu nkabela

inga mwazumina kuponesegwa kwanu. Jesu Kristo wamubamba kuba kabotu. Obo mbumbubo Mbwa kasyomezya kucita. Pele Nsenya babona bantu mu buumi bwangu.

Amunesia ya kumuuya!

¹⁸⁸ Jesu wakati, “I milimo Nje cita moyo icita anywebo. Ii kaindi kaniini, nkabela inyika tai kandiboni limbi; nekubaboobo moyo Ndi bona, nkambo Ndi,” bbala lyaamba mugame, “yooba a ndinywe, nomuba muli ndinywe, kusika ku mamanino aa inyika.” “Jesu Kristo mbobuca nguwenya, sunu, amuya myaaka.”

¹⁸⁹ Eno, ku baalumi a banakazi omuno, abo bajisi cilubide kuli mbabo, cakuti tamu konzyi kubona buyo nzila . . . Nywebo, mu yanda kusyoma, pele tamu konzyi buyo aknjila muli ncico, alimwi tuyanda ku kombelwa, tuyanda ku Mu zmina kuciindi nomuli mu Busyu Bwakwe, inga mwasika akwiimikila mpoonya awa munsi lyangu, andi kombe a kubikka maanza ali ndinywe. Ikuti na mwaboola atala eni awa eno, nywebo nomuciswa mbuli boobo, ku amunesia ya kumuuya, alimwi tuyanda ku kombelwa, kutegwa mwanguluke kuzwa kuli ceeco. Ikuti na toli ii—tolii musyomi, pele uyanda ku kombelwa, boola atala awa akwiimikila. Leza aku longezye, omwaalumi mukubusyi. Muntuumwi umbi ulaboola? Leza aku longezye, omulindu. Boola. Leza aku longezye, omulindu mukubusyi. Muntuumwi umbi ulaboola? Boola, imikila eni atala, eno buya.

¹⁹⁰ Amunesia ya kumuuya, Nse yandi kuumwa a yeeyo. Leza wakaka. Andi lekele—andi lekele kufwa ku—ca cili conse, pele kuta ndilekela kufwa mbuli uutasyomi.

¹⁹¹ Boola, ko Mu zmina eno. Sa toko cicita? Muboola kuzwa, a kuseluka kuzwa ku bbalukkoni, beenzuma. Ntaamo zisyoonto buyo anselelo awa, alimwi inga caamba lwandaano akati ka lufu a Buumi, kuli nduwe.

¹⁹² Amulange, Nse konzyi kubamba Kristo kuta cita cintu. Kristo taelede kucita cili conse cita cintu comwe: We elede kubamba Ijwi Lyakwe. We elede kucita ceeco muncililano kuti abe Kristo, abe Leza. We elede kubamba Ijwi Lyakwe.

¹⁹³ Lino koyeeya, ikuti na toli masimpe a luzibo lwako, nkaambonzi kutasika eno. Ikuti na uzulilwa buyo ku kabungwe, ikuti uli muzukulu wa Pentekoste, Leza tajisi bazukulu bali bonse. Walo ujisi bana basankwa abasimbi, pele tajisi bazukulu balombe a basimbi pe. Mwabona? Leza tajisi abo pe. Walo ujisi buyo bana basankwa abasimbi, nkabela ulizyi kuti toli boobo.

¹⁹⁴ Ndiza wa kaambaula mu myaambo, kwayanda waka zyana, kwayanda wakacita conse *eci*. Oko kuli kabotu. Nse jisi cintu ca kucilwana. Pele nekubaboobo ikuti na ucijsi amunesia ya kumuuya, koselemuka, akusika awa a kwiiimikila awa. Atu cikombele. Ncinzi nco mwaamba? Membala wa cikombelo,

membala buyo ii—buyo wa cikombelo kuzina, nkaambonzi to booli atala awa kuti tu cigosye ndyoonya eno?

¹⁹⁵ Nse yandi kusiya Birmingham awa a kuziba kuti buzubabumwi, cindi Lubeta lwa kusika, elyo Njo elela kwii mikila mpawo kumbele lyako... Koyeeya, Njo kuswaangana alubo. Ikuti na Nse kakuswaangani okuno ali ceeci, na pe Ndiyo kuwaangana ku Lubeta alimwi Njo elela kuyo vwiilila Nce wamba sunumasiku.

¹⁹⁶ Eno amuswiilile. Amweempwe, beenzuma! Amweempwe, muzwe muli ncico. Amuzwe awo. Kamuboola eno.

¹⁹⁷ Eco ceelede kubamba mwanakazi onse uugeledwe masusu mu cisi eci, na obu busena, kuboola atala awa eno. Mbo mbubo ncobeni. Kutu, kuti tojisi luzyalo lukubwene lwa kaamba ncobeni kuti, "Ndi—Ndi—Ndi—Ndi yanda, Ndi yanda kulekela masusu angu kulampa, Mukwesu Branham." Ce elede... "Nde elede... Ee, Nse jisi luzyalo lwa kucicita."

Baa, yebo watu, "Sa eco cijisi cimwi cakuciti kuli ncico?"

¹⁹⁸ Okuno kutali ciindi cilamfu cakainda, mukutausi wini mulemu wakandi sikila, akuti, "Ndi yanda kubikka maanza ali nduwe, Mukwesu Branham." Kati, "Boonse bantu bakulanganya mbuli musinsimi."

Nda kati, "Nse kaamba kuti Nda kali musinsimi."

¹⁹⁹ Wa kati, "Pele bantu bakulanganya boobo. Yebo lyoonse uzapaula banakazi, kujatikizya kusama zibbudula," alimwi—alimwi, oh, mwaalumi muna Pentekoste. Elyo kati, "Kujatikizya kusama zibbudula, a kugela masusu abo, a zintu." Kati, "Eyo taili ncito yako."

Nda kati, "Ni ncito yani kai?"

²⁰⁰ Elyo wa kati, "Balo bantu, nkaambonzi toyisyi banakazi nzila yakuba, a zipego zipati zya kumuuya, a kugwasya bantu, mubusena bwa kusola ku..." Kati, "Bala kulemeka. Eco neco baambila, inga baku syoma." Kati, "Nkaambonzi tobaambililiza ya kujana zipego zipati a kugwasya bantu, mu busena bwa kubatapatila lyoonse?"

²⁰¹ Nda kati, "Mbobuti Mbwe konzya kuba yiisya alujebra kakuli akwalo taba kakonzyi kwiiya abo ma ABC abo?" Mwabona? Mwabona?

²⁰² Weelede kutalikila aansi, empwa na pe waloba! Lino ula konzya kulyeeleka omwini, empwa na pe waloba! Jesu Kristo walizibya Mwini cakumaninina okuno, busiku a busiku. Alimwi obu mbo busiku mbo twali kupa ku lufutuko olu. Ni ntaamo buyo zisyoonto atala awa, nkabela Ndi jisi ciindi cinji cakulindila.

²⁰³ Yeeya, Birmingham, bulowa bwako tabuli ali ndime. Nse jisi kaambo. Ikuti na ujisi Muuya Uusalala nconzyo, ujisi coolwe ca kuboola eno. Alimwi ikuti na uciswa musyobo umwi wa

sikunjila mbungano uukucitya kuba a amunesia ya kumuuya, nkaambonzi tosiki? Jesu ulasilika. Sa toko sika?

²⁰⁴ Eno bantu bamwi bazwa mu bbalikoni. Ndali kulindila kubona mpo babede, kuzwa na kuboola ku cipaililo. Aba anselelo awa, amubole atala kuzunguluka. Mbo mbubo. Nywebo nomuli ano, amuboole kuzunguluka cipaililo, kwaamba, “Nda manizya kuli ceecei.” Iiyi, bali kuselemuka, balindu bobilo. Kuli kabotu.

²⁰⁵ Amuboole eni atala eno. Ntaamo buyo zisyoonto kuzwa kuli ncico. Alimwi ntaamo inga zyabamba lwandaano.

²⁰⁶ Eno, amulange, Ndi yanda kumubuzya cintucimwi. Ino kuti Wa sika sunumasiku? “Oh,” kwaamba, “Tako boola.” Ta ndizi naa Mpali na pe. Eci ncitondezyo camamanino. Amuyeeye, MBUBOOBU MBWAAMBA I MWAMI! Sena mwakasola kundi mvwa kwaamba boobo cita eco cakali ca bwini? Muli mukubona citondezyo camamanino. Eco nca Malembe. Mwa cibona citondezyo canu camamanino, noba Pentekoste. Muta nyongani eno a ceeco Nca kasyomezya Israyeli kwakiinda Kukwempwa; awo tamuli ndinywe. Mwa mana, mpawo. Mwabona? Eno obu mbuzuba bwanu. Eno ncitondezyo canu. Eno nciindi canu. Muta Ci kaki. Muta cici. Ncibotu mwasika. Mula syoma na kuti ndili mulanda wa Leza? Amuyeeye.

²⁰⁷ Birmingham, Nsena kuswaanganya bantu babotu loko. Muli bantu babotu loko mbo Ndi yanda kuswaanganya mu buumi bwangi, pele mu yandikana lubukulusyo. Muli mukufwa. Muya bubweza amunesia ya kumuuya. Muli mukufwa. Muta citi ceeco. Amu bukulusye eco nco mujisi. Amu ciyutule alubo, cakufwambaana, Jesu kataninga kuboola.

²⁰⁸ Yaa, kuciindi niba... Muzumanane kuboola. Aba zumanane buyo kuboola mane tubweze bonse, abo Mwami mbaita, atala awa. Amuboole eno.

²⁰⁹ Amugwisye amunesia eyo. I Musilisi mupati uli waano eno kukuponya eyo, kwiigusya kuzwa kuli nduwe. Wa tondezya kuti Mpali ano. Mbangaye bata zilibye aceeco, kwinda kukutambika janza lyako, kuteeti, “Nda cisyoma ncobeni; kuti Wa katи Uyo cita ceecei”? Mwabona? Lino Mpali awa. Mwabona? Mwabona? Mula syoma.

²¹⁰ Alimwi mbangaye abo bazyi kuti Ndi mwaambila bwini, kuti muli mukufwa nkabela tuyandikana lubukulusyo? Mwabona? Bwalo mbwini.

²¹¹ Muli bantu babotu. To konzyi kujana bambi babotu. Takukwe kuduntaana kubotu kwa myoyo, kwiinda kunsi lya ayo mashaati akaindi a Kumusanza anselelo awa. Mbo mbubo, bantu beniben! Pele, nobantu, ncibotu mwasinsimuka, cakufwambaana loko! Mu oora ndyo muta yeeyeli, inga cacitika. Inga tii cacitika; Ta ndizyi.

²¹² Pele, amuyeyeye, mutambula citondezyo canu camamanino, aboobo amucije nokucili ciindi cakucija. Amuboole eno. Kufumbwa kuti kaba boola, Ndila zumanana kulindila, nkaambo inga kwaba...Buntu bomwe buulwa manyika ali zyuulu zili makumi. Elyo kufumbwa kuti bantu kabalamidwe...

²¹³ Ndi yanda kubona oyu kupasukila mu lubukulusyo lupati luya kuyasya mbungano yonse mibusena obuno; ikuti na mwaleka kwiimpana kwanu a kugwisya kulyanda oko konse, a kuzumina Muuya Uusalala. Mu taminina kuti mula Usyoma. Mu taminina kuti mula Usyoma, alimwi, cindi Wa boola kulizibya Wini, mpawo mula pambukana umwi aumwi. Nkaambonzi kuta swaanganya myoyo yesu ku Ijwi lya Leza akusyoma Bwini? Eco nce cintu. Muyo zumanana buyo kufwa, kufwa, alimwi mula zumanana moonya mu Laodikeya. Mbubonya Mbwa kasyomezya, Ciyo oba booboo. Toko boola eno na? Eno mbo buzuba. Eno nciindi catambulika. Amulangilile eco Muuya Uusalala ncouya kucita.

²¹⁴ Eno Ndi yanda bakutausi boonse okuno, babikkila maanu mu bantu aba, amuboole mukombe andime, anywebo. Amuboole atala awa, bakutausi boonse abo babikkila maanu mu bantu aba. Amuboole, amuboole buyo kuzunguluka, a kunjila akati ka bantu, mukutausi na mubelesi wabugame, mubele wabugame mubotu, banakazi banga bayabda kwimikila antomwe a banakazi aba eno. Ndiyo syoma, a moyo wangu onse, kuti Muuya Uusalala ula boola mu busena obu mpoonya ano lino a kulizibya Mwini akati ka bantu aba.

²¹⁵ Eno andi lailile aba bantu okuno, lutaanzi. Eno, beenzuma, kufumbwa ncoli waano, Uli zyi. Elyo Nda konzya ku citondezya kuli ndinywe, Ciyo tola, omwe a omwe, ku muleta awa aa cibumbili eci, alimwi takukwe cintu comwe Nca tako yubununa. Lino eco cakali ciindi Ne kali mulombe muniini. Eco ncipego tacili mu kubuzigwa. Pele mubuzyo ngwa kuti, sa inga wacitambula? Sena ula cisyoma? Lino Mpali ano. Ee, ikuti na Mpali ano, nkokuti kuli cintu comwe biyo, Ula libamba Ijwi Lyakwe. Mpawo kositoma buyo kuti ucitambule, aku cizumina, a kubuka akuti, "Mwami Leza, Mpaawa mpendi ku cizumina," a kukkanal buyo alya kusikila cicitika.

²¹⁶ Mbali Buddy Robinson ciindi cimwi wakati, mu muunda wamaila. Wa kati, "Mwami, ikuti na Uta ndipi Muuya Uusalala, cindi Wa akujoka Uyo jana cilwi ca mafuwa kaalede mpoonya awa." Wa kali sinisizye cakumaninina. Alimwi toka kajane cimwi kuzwa kuli Leza kusikila wapengaana kapati.

²¹⁷ Eno, sena mwakabona zisyango zya sunu, sena mwakabona sunu nco tucita? Swebo, mubwini, tu jisi Leza ukubwene kujatikizya ndiswe kusikila awo toonse mpo tuboola atala lya cibumbili, tu lati, "Iiyi, ndiza Ndi boole atala." Lino

olu ndoluzibo lwa inyika yoonse. "Iiyi, Ncibotu ndatanta a kwiimikila." Kwaamba, "Ee, ee, ta Ndi zyi. Mpaawa Mpendi, mwabona." Humu! Ino mbusena bwakuba! Taakwe mulilo uuyaka. Kunyina kuyandisisya kapati. Ta kukwe "kuya muli Nguwo!" Elyo, mbuli muvangeli, eco cindipenzya kubona bantu ba Leza mu ciimo eco. Twe elede kusuka mulilo.

²¹⁸ Pele, nywebo mwabona, ino ncini? Ncico Nce mwaambila. Ciyubunuzyo 3, "Ula kasaala. Alimwi," Wa kati, "nkaambo ula kasaala, nkokuti Njo kuswida kuzwa ku mulomo Wangu." Mbo mbubo na? Nce ncico Nea kaamba. Alimwi, ikuti na Wa kaamba ceeco, nce ncico Ncaya kucita. Aboobo tu tasyankani obo.

²¹⁹ Uli waano, uubulide. Atu Ta ambule, nape kufwa, mpoonya awa. Mbo mbubo. Atu Ta ambule, nape kufwa.

²²⁰ Eno, mukwesu mucizi wangu, uuyandwa, ikuti Nda konzya kuseluka a kukugwasya kucita cintucimwi, inga Nda cicita nconzyo. Eno, ku cipego, Nda konzya ku kwaambila ncoli waano. Nda konzya ku kwaambila cintu, ku Muuya Uusalala, ku Muuya wa Leza, kukwaambila eco nco boolela, eco ncoka cita, aciindi ciboola mbo ciya kuba, na cintucimwi mbuli abo; pele eco tacicibambi kuli ncico. Weelede kucizumina Eci, lwako. Kweelede kuba nduwe!

²²¹ Eno sa mwalibambila? Tambika janza lyako, akuti, "Ndali bambila. Ndali bambila kufwa mpoonya awa." Eno uta cicit citakuti wa cikanza. "Ndali bambila kufwa mpoonya awa, na kujana eco Nce yanda kuzwa kuli Leza." Ameni. Sa mwali bambila ncobeni?

²²² Mpawo bbunga alimikile, koonse. Eno antoomwe, antoomwe, atu likamantanye antoomwe. Atu paile. Alimwi atu buyo... Nobakutausi eno amuunke kuli aba bantu ano, umwi aumwi, nkabela mwiiminina maanza a Kristo eno.

²²³ Nywebo nomuyanda Muuya Uusalala, nywebo nomuyanda luzibo olo, kutali kubotelwa kwa kunyanyamukwa; tuyanda Muuya Uusalala, Buumi, nseke ya Buumi mukati kanu. Alimwi uyanda kugusya eyo amunesia ikubamba ku—ku takonzya kulizibya omwini; nkabela tozyi awo mpoimvwi; tozyi obo mbobede; atu igwisye ndyoonya eno! Nkooku Kuzyalwa kwanu kupya awa, kuzyalwa, Kupya kwini kasimpe.

²²⁴ Atu bikke maanza ali baabo bantu. Atu, umwi auwi, atutambike maanza esu a kupaila a kuzuminana komwe.

²²⁵ Taata wakujulu, mu Zina lya Mwami Jesu, cipe, Mwami, eco mu Zina lya Jesu Kristo, kuti Muuya Uusalala uboole sunumasiku, aya masiku amu Mujibelo, oko Muuya Uusalala nkowa kawa mbuli guwo lyanguzu lyuungisya. Akube kuti aba bantu babbizigwe mu Muuya Uusalala. Akube kuti Mulilo a Nguzu zya Leza zita basiyi. Ikuti na nkobali kuseeni, akube kuti ba kkale, ba kkale kusikila Muuya Uusalala usike.

²²⁶ Oyo ngo muzezo! Nce ncico! Ngooyo We. Oyo Muuya Uusalala uboola. (Nda cicita. Ndili cizyi eco.)

Kwa mana. Amu Cisyome eno! Amu Cizumine! Amu zuzigwe Zilongezyo Zyakwe.



AMUNESIA YA KUMUYA TNG64-0411
(Spiritual Amnesia)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa mu Mujibelo mangolezya, Mukubwekaangala 11, 1964, ku National Guard Armory mu Birmingham, Alabama, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org